

NTINU ME LOSAMA



. . . samu na nkembo ya Mfumu kukulumuka na zulu ya beto bubu yayi na nzila ya kulonga ya Ndinga. Mpe ya ke. . .

² Sabala yayi me luta, mu vwandaka mwa fioti ya kuvwalangana. Mu zola tuba mutindu yina ve ya kuvwalangana; ya ke kizame ba zolaka sadisa munu, kizame ya nzutu. Mpe yawu yina beno kuwaka, ti mu vwandaka na lupitalu. Kikuma samu na yawu mu vwandaka kuna ya ke samu na kutina kukwenda mpe kuvutuka na simu yina ya nzadi. Ba ke sadisa beno kizame samu na kitini ya zulu ya tube digestif, mpe misopo. Mpe ba ke sala yawu, na minuti tanu nionso, bawu fwana vutuka diaka samu na kizame ya radiographie. Kasi beto lenda sadisa bakizame yango, kana beto zola kwenda longu na bayinsi ya banzenza, na bangonda sambanu nionso. Mpangi Roberts na bayankaka, mu banza, ke sadisaka ya bawu na bangonda sambanu nionso. Kasi mu me sadisa ata mosi ve na bamvula yiya.

³ Mpasi kele ti, mu ke zolaka ve mafuta ya ricin, mpasi mosi kaka yawu yina. Mpe ba ke tubaka ti ya ke na kima yankaka ve ba lenda pesa na kisika ya yawu, na yawu munu, oh, mu kumaka na kimbevo mingi ntangu bawu pesaka munu kima yina. Beno zaba, mu tubaka na beno, na disolo ya luzingu ya munu, wapi mutindu kima yina vwandaka pesa munu kimbevo mingi. Mpe—mpe mu ke zolaka ve kubaka kima ya mutindu yina. Mpe mu tubaka na dokotolo ya munu ya luzolo, kana. . . “Ya ke na kima yankaka ve?”

Mpe yandi tubaka, “Mu ke banza ve, Mpangi Branham.”

⁴ Oh, ntangu mama yina kotaka na yawu kuna, ya monanaka mutindu yina, mbala yankaka mu ke na kulutisa, kasi, ya monanaka mutindu ti ya vwandaka na litele mosi. Ya—ya vwandaka. . . Mu me monaka ya mingi ata fioti ve. Mpe mu kangaka kaka mbombo ya munu mpe mu vwandaka na mpusa ya kuluka. Kasi nsuka-nsuka mu kulumusaka yawu.

⁵ Kasi ntangu yayi, na kati ya kumekama nionso yina, mpe nionso yina salamaka, mu zola kutonda Mfumu bakizame ya mbote-mbote. Mu lutisaka yawu mbote, nkama na zulu ya nkama; mu lenda kwenda basika nionso na yinza bisika nionso mu lenda kwenda. Mu yufulaka badokotolo, yina vwandaka ba-spécialiste tatu ya kulutula mbote, ti, mu—mu banza, na Louisville. Mpe mu yufulaka bawu, mu tubaka, “Mu ke ya kulunga ve pene-pene ya kumi na zulu ya nkama mosi?”

⁶ Yandi tubaka, “Nge ke na yawu ata fioti ve.” Yandi tubaka—tubaka, “Nge ke na mavimpi ya kulutula mbote, na mutindu nionso.” Mpe mu ke vutula matondo mingi na Nzambi. Nani

yankaka lendaka pesa muswa kukondwa Tata ya Mazulu, beno me mona, ti ya vwanda mutindu yina?

⁷ Mpe yandi tubaka, “Ya nge . . . Kulandila diagramme ya nge, kuna, nge ke monana ntwenia.” Yandi tubaka, “Ba-cellule ya nge ya menga me banda ntete ve na kusoba, to kima yankaka.” Yandi tubaka, “Nge ke na mavimpi ya mbote, Mpangi Branham.”

Mpe mu tubaka, “Mbote, mu ke na kiese mingi.”

⁸ Mpe mu kuzwaka ntangu ya mbote ya kutuba, ya kupesa kimbangi na ba-infirmière nionso na lupitalu yina, mpe na badokotolo nionso, ya Kimfumu ya Nzambi. Mpe dokotolo mosi, mu banza ti ya lenda vwanda awa na suka yayi. Mpe mu—mu ke . . . Mu ke na kiese na kuzaba ti ya ke kaka na babakala ya mbote na yinza yayi, babakala ya kieleka, babakala yina lendaka sadisa munu ba kizame ya kieleka, na bilumbu tanu, yina lendaka vwanda na ntalu ya bankama zole to tatu ya badollars samu na konso kizame. Ntangu mu kumaka na nsuka, bawu tubaka, “Yayi ke nsisani ya beto samu na ndinga ya Mfumu, yina nge ke na kusala.” Beno me mona? Yinga. Ata . . . Bawu tubaka, “Kasi, nge ke yangisa beto, samu na kulomba beto yina nge fwana futa beto.” Bawu tubaka, “Sambila samu na beto kaka!”

⁹ “Mpe na kati ya beno,” bawu tubaka, “beto ke nsatu mosi ke telemisa ntima ti beto lenda bakula yawu ve.” Mpe mu tubaka . . . “Beto . . . Ya—ya ke monana ve ti . . .” Yandi tubaka, “Na nganda, beno ke na kidi-kidi ve to ya kuyangama. Kasi,” yandi tubaka, “na kati, ya ke na nsatu mosi ke telemisa ntima yina beno lenda bakula ve.”

¹⁰ Mu tubaka, “Kana beno zola vwanda kaka awa na mwa ntangu fioti, mu ke tuba na beno.” Mpe mu bandaka na kutubila ba-vision. Ya vwandaka kisalu yankaka samu na bawu. Bawu zabaka kima mosi ve samu na yawu. Mu tubaka na bawu samu na Biblia. Na manima mu tubilaka vision yina Mfumu pesaka munu kilumbu yina, mpe bawu bandaka na kudila mutindu babébé. Bawu vwandaka kaka kuna mpe bandaka na kudila. Mpe mu . . . bawu . . . Mu tubaka, “Mu banza ti beno ke baka munu ve mutindu fanatiki mosi ya nsambulu to muntu yankaka.”

¹¹ Yandi tubaka, “Ata fioti ve, Mpangi Branham. Mu ke kwikila yawu na ntima ya munu nionso.” Yandi tubaka, “Kasi kima mosi kaka mu zola kutuba: Nge kwendaka ve na lukolo samu na kulunguka mambu yina.” Yandi tubaka, “Mu ke kwikila ti ya me katuka na Nzambi ya Ngolo nionso.” Mpe ya vwandaka badokotolo tatu yina me zabana mingi na Louisville, yina ya kulutula mbote mu me zaba. Mpe, na yawu, mu vwandaka na kiese mingi samu na yawu, mpe samu na kuzaba ti mbala yankaka Mfumu me pesa munu muswa ya kukuna mwa Nkuna kuna.

¹² Ba-infirmière nionso, mu tubaka na bawu. Bawu, na suka mosi, na kubasika na kivinga ya radiographie, mu tubaka na . . . Mu talaka mwa kento mosi ya mputu. Yandi vwandaka na kimbevo mingi. Mpe mu landilaka kaka na kukwenda, mu kwendaka tii mu kumaka kisika yandi vwandaka. Mu banzaka ti yandi vwandaka me kufwa. Mpe mu tubaka, “Mu zola yufula nge kiuvu mosi, mpangi-kento.”

Yandi tubaka, “Yinga, tata.”

Mu tubaka, “Nge kele Muklisto?”

Mpe yandi tubaka, “Mu kele mundimi ya dibuundu *kingandi*.”

¹³ Mpe mu tubaka, “Mu zola kaka ti nge bakula munu fioti mbote-mbote.” Mu tubaka, “Mu—mu zola zaba kana nge kele Muklisto, Muklisto ya kieleka. Ti, kana nge lendaka zabuka nzadi yayi ya luzingu, samu na kukota na Yinsi yina yankaka, nge ke zola Yandi?” Mu tubaka, “Ya kieleka nge ke zola kuvuluka?”

Mpe yandi tubaka, “Yinga, tata. Mu zola yawu.”

¹⁴ Mpe mu tubaka, “Na yina Nzambi kusakumuna ntima ya nge. Ata yinki mutindu mupepe ke bula, na yina nge ke vwanda kaka mbote, na ntangu kaka ya ke vwanda mutindu yina.”

¹⁵ Mpe kana beto tambula fioti, ya kele diaka na bantu mingi ya luzolo na yinza yayi.

¹⁶ Ntangu yayi, bubu yayi, mu me kwisa na vision mosi yina mu ke tuba na beno na ntangu ke kwisa. Mpe mu ke zola, ntete, kubaka mwa Ndinga, samu mu ke kwikila ti Ndinga ke na mfunu mingi, yina me lutila mfunu na ntangu yayi. Mpe mu ke na kiesa na kumona Charlie Cox, mpe, mpangi-bakala, nkundi ya munu me telema kuna, kintwadi. Mpangi-bakala, mu ke banza ve . . . Jeffries, mu ke banza ve nkumbu ya yandi. Mingi na kati ya beno bampangi yankaka ya luzolo ya Georgie, ya bizunga yankaka ya yinsi. Nkundi ya munu ya ntama, Bill, yina me vwanda awa, mu banza mutindu yina, na suka yayi. Mpe—mpe mingi . . . Mpe mpangi-bakala ya Georgie kuna, bantu yina pesaka munu kazaka yayi. Beno zaba, ya kele—ya kele mosi ya bakazaka ya kulutila kitoko mu me lwataka ntete ve. Ya kele kitoko mingi, ya kieleka ya kele kitoko mingi. Mpe mu zola beno mingi. Ntangu mu tubaka na beno yina me salama, na mwa bilumbu yayi fioti me luta, samu na munu, beno ke mona samu na yinki mu ke banza ti ya me tuba mingi samu na mingi.

¹⁷ Ntangu yayi, mu ke kwikila, kana Mfumu kuzola, mu ke landila kaka na kunwana kulutila bilumbu nionso na ntwala, na luzingu ya munu. Samu, mu me mona yawu ntangu yayi ya ke . . . Mpamba ve, mu lenda kufwa bubu yayi. Ya ke, mu zaba ve. Ba-electrocardiogramme ya munu mpe bima yankaka, mitindu ya luswaswanu kumi na sambanu ya radiographie, yinga, kizame

ya kieleka, me talisa ti mu vwandaka na . . . mu vwandaka mbote mutindu muntu ya mavimpi ya mbote lendaka vwanda, muntu na zulu ya ntoto. Na yawu mu ke vutula matondo samu na yawu. Kasi, mambu nionso, ata ti nionso yayi, mpe mu ke vutula matondo mpe mu ke pesa lukumu na Nzambi, ti mu kele, ti mu ke kwikila ti Yandi ke keba munu na kisalu ya Yandi, yawu yina ve Yandi talisaka munu na ntangu fioti na ntwala ya yawu, beno me mona, mu vwandaka na kiese mingi samu na yawu.

¹⁸ Ntangu yayi, mu banza, na nkokila yayi. . . Nge me ndima yawu? [Mpangi Neville me tuba, “Yinga, tata.”—Mu.] Mpangi ya beto—ya beto ya ntalu kele—kele na munimi ve, ya kele—ya kele Mpangi Neville. Mpe bayanaka na kati ya beno vwandaka awa na Lumingu me luta mpe bawu kuwaka nsangu yina ya kitoko yandi longaka, “dibungu ya mafuta,” ya vwandaka mo- . . . mosi ya bansangu ya kulutula kitoko mu me kuwaka ntete ve, ya vwandaka yina Mpangi Neville longaka, na nzila ya Mpeve-Santu, na Lumingu me luta, na dikabu yayi ya mameme yina Nzambi me vukisa kintwadi.

¹⁹ Mpe kana ya ke vwanda mbote mingi, kana ya me sepelisa Mfumu, mpe Mpangi Neville mpe dibuundu, mu zola tubila diaka na nokila yayi mpe kubanda bandandani ya, mu zola tuba, Kilumbu ya ntete na nkokila . . . Mu zola kutuba, Lumingu na nkokila, mpe Kilumbu ya tatu na nkokila, mpe Kilumbu ya sambanu na nkokila, bandandani samu na yina mu me longuka.

²⁰ Mu fwanaka vwanda kuna ve na lupitalu. Kasi ba vwandaka mbote mingi samu na munu, bawu pesaka munu kivinga mosi na ndambu ya tatu ya ntalu. Mpe na yawu mu bakaka kaka ba-Biblia ya munu, babuku ya munu, mpe mu matisaka yintu ya mbeto, mpe mu vwandaka na ba-Biblia ya munu nionso mpe bima yankaka ya kupanza pene-pene ya munu. Mpe mu kuzwaka ntangu ya mbote, tii kuna bawu nataka mafuta yina ya ricin. Ntangu ya munu sukaka kaka na ntangu yina. Mu—mu sukaka kaka na ntangu yina. Kasi, Mpangi Pat, mu vwandaka na kimbevo mingi. Kima yina, mu lenda kangila yawu ntima ve. Mpe, kasi mu lutisaka bantangu ya mbote, bilumbu tatu to yiya ya ntete. Mu lutisaka bantangu ya mbote.

²¹ Mpe mu vwandaka longuka Buku ya ba-Ephésien. Oh, kutula Dibundu na kisika ya yawu! Mpe mu banza ti ya ke kima mosi ya kitoko.

²² Mpe—mpe kana beno, ntangu yayi, kana beno ke na dibuundu yina beno ke kwendaka, beno kwenda kaka na ntwala mpe beno vwanda na kisika ya beno ya kisalu. Kasi kana beno ke na dibuundu mosi ve, mpe beno zola kwisa vutuka na nkokila yayi, mpe na Kilumbu ya tatu na nkokila, mpe na Lumingu na nkokila, mu zola kubaka, na nkokila yayi, Buku ya 1te ya ba-Ephésien, mpe Kilumbu ya tatu na nkokila, kapu ya 2 ya ba-Ephésien, mpe na Lumingu ke kwisa, kapu ya 3 ya ba-Ephésien,

samu na kusungika Dibuundu. Beno zaba yina mu zola kutuba, kutula Yawu—Yawu, na kisika ya yawu. Mpe mu banza ti ya ke kima yina ke tunga Dibuundu.

²³ Mu kele ve. . . Mu ke—mu ke longa yayi kaka na bantu yina ke kwisaka na Branham Tabernacle.

²⁴ Mpe bayankaka na kati ya beno bampangi ya luzolo. . . Mu zaba bayankaka na kati ya beno, mu banza, kele na balukutakanu. Ya ke na baleke ya beto kuna na Sellersburg, mpe—mpe bayankaka, ke na balukutakanu. Ntangu yayi, beno tala, ya ke balukutakanu ya reveil. Beno kwenda kuna. Ba ke misadi ya Klisto, bantwenia ya babakala yina me telema na kati-kati, bayina me basika. Ntangu mabuundu ya bawu mpe me manga Kieleka, mpe nionso yina, ba me basika kuna. Mpe Nzambi me bokila bawu na kisal. Yinga, tata. Mu—mu ke sepelaka na bakala mosi. . . Mu lenda bambuka nkumbu ya yandi ve. Kasi yandi kele bakala ya ntwenia, ya mbote, bakala mosi ya kitoko na kutala, na kento ya mbote mpe bana.

²⁵ Mpe—mpe Mpangi Junie Jackson yina ke na balukutakanu ntama mingi ve na awa, yina kele diaka trophée ya kitoko ya nene, ya lemvo ya ngitukulu ya Nzambi. Mpe ntangu ya ke na balukutakanu ya ba-reveil na mabuundu ya beno, beno kwenda kuna, samu beno. . . yawu yina beno fwana sala. Samu, beno zaba ve, na ntangu yankaka nsumuki mosi lendaka kwisa na autel, mpe beno lenda tindama na kutwadisa muntu yina na Klisto, yina ke vwanda ndandu ya beno ya nene na simu yina yankaka.

²⁶ Yayi ke kaka malongi samu na kusungika Dibuundu, awa na tabernacle, samu na kusadisa beto na nzila.

²⁷ Ntangu yayi, mu me nata monteale ya munu ve, na yawu muntu mosi ke tala ntangu samu na munu. Doc me talisa na munu ntangu, yandi kele na monteale mosi, na yawu, mpangi ya munu ya bakala. Na yawu. . . [Mpangi Edgar “Doc” Branham me tuba, “Mu ke pesa nge kisal ya mingi ve samu na yawu,” mpe yandi me pesa monteale ya yandi na Mpangi Branham—Mu.] Nge ke pesa munu kisal ya mingi ve samu na yawu? Mbote mingi. Mbote, ntangu yayi, ya ke mbote mingi. Mbote, ntangu yayi, mu ke kwikila ve ti diambu yango kele mbote, na kubanda. Na yawu. . . [“Matondo na nge. Mu ke tuba mosi samu na nge.”] Ntangu yayi, oh, oh, sh, sh, sh, sh. [“Mu bumbaka bampata kumi, na mukembo ya munu ya lubutuku, na suka yayi, kaka samu na kusepelisa nge.”] Mutindu yina? Ntangu yayi ya ke. . . Na yina monteale yayi me tambula mbote mingi, Doc. Yandi me tuba ti yandi bumbaka bampata kumi, na kilumbu ya yandi ya lubutuku, samu na kusepelisa munu, samu ya ke na bamvula zole to tatu kati-kati ya yandi na munu. Na yawu beno lenda mona kisika mu kele, na ntwala. Kasi, oh, yina kele diambu ve, samu na munu. Ntangu yayi, mu ke tuba ve ntangu ya yinda.

28 Ntangu yayi, kana ya ke na banzenza na kati ya beto, ya kieleka beto ke zonzila beno kukwisa ya mbote na bantima ya beto ya muvimba. Kukwisa ya mbote na beno awa na mwa tabernacle yayi. Beto ke na kisika ya nene ve. Ya ke na kati ya manaka ntangu yayi samu beto tunga, kisika ya nene ve, kasi kaka . . . Yayi me beba mingi. Mpe beto ke meka na kutunga mwa yinzo-Nzambi ya kitoko ya mbote awa, na ntangu beto . . . Mfumu ke pesa beto muswa ya kusala yawu. Mpe mingi na kati ya beno nionso ke na kusala kingolo-ngolo samu na yawu, mpe ya kieleka beto ke sepela na yawu.

29 Ntangu yayi mu zola beno kubaka na munu, na suka yayi, samu na kutanga, na Samuel ya Ntete na kapu 8, mpe beto banda pene ya nzila ya 19, nzila 19 mpe 20, mbala yankaka, samu na mwa masonuku yina beto ke zonzila.

30 Mpe ntangu yayi, mutindu beno ke baka yawu, na ntwala beto . . . Beto ke tanga yawu, na yawu beto ke sambila. Mpe ya lendaka vwanda na balombilu na suka yayi, muntu yina ke tuba, “Beni bambuka kaka moyo na munu”? Na lukutakanu ya beto me luta, basabala zole me luta, to tatu, ntangu mu vwandaka na lukutakanu . . . Beni tuba, beto . . .

31 Na kulutaka, na ntangu beno ke na kusosa yawu, lukutakanu ke banda na Chautauqua, na kilumbu ya 6 ntangu yayi. Beto ke vingila ntangu ya nene, na Middletown, na Ohio. Beni yina me kuzwa bantangu ya beno ya kupema, beno kwisa kuna. Mpe ya ke na kisika mosi ya nene samu na kulenga, kaka pene-pene ya nzadi, kisika, oh, beto . . . ke vwanda na malongi mingi beno me kuwaka ntete ve. Ba ke vwanda bisika nionso pene-pene ya nzadi, milongi ke vwanda kuna, na konso suka, na konso mwini mpe na konso nkokila. Na yawu bawu nionso ke vukana kintwadi. Ya ke kisika mosi ya nene samu na kulenga, ya nene mingi kulutika Silver Hills, na bambala mingui. Mpe—mpe ya ke na kisika mosi ya nene yina beto lenda tula kubanda mafunda nana mpe mafunda kumi ya bantu. Mpe ya ke kaka ya kufuluka. Beto ke vwanda na ntangu ya nene na Ohio.

32 Mpe kiboba yayi ya Mpangi Kidd, yina mu kwendaka sambidila, na suka yina. Beni nionso ke bambuka moyo ti mu tubaka na beno yawu, basabala tatu me luta? Dokotolo pesaka yandi bangunga makumi zole, samu na kuzinga. Yandi me telema mpe ke na kutambula. Yandi tangaka Disonuku mosi, nkunga yina yandi lendaka yimbila ve. Mpe ntangu mu kumaka kuna mpe mu monaka yandi, na suka yina, mpe ya me lwata mwa echarpe. Mu katukaka awa pene ya bangunga tatu to yiya na ntwala kilumbu kubanda, samu na kukuma kuna na yandi. Bawu tubaka ti yandi zolaka kufwa kilumbu yina; na cancer ya prostate.

33 Mpe mwa kiboba ya kento ya yandi, ya ntalu, vwandaka sukula bilele samu na bampata makumi tanu, na kilumbu mosi;

na ntwala kilumbu kubanda, tii na nkokila, samu na bampata makumi tanu, samu na kukeba bakala ya yandi na kisika ya kulonga. Na manima ya kulonga na balukutakanu ya reveil ya basabala zole, mpe yandi kutikaka dikabu mosi, yandi kuzwaka bampata makumi nana.

³⁴ Kasi ntangu mu monaka bawu ya kuvwanda kuna na suka yina, bawu zole, bankwelani yayi ya biboba, mwa bankwelani yayi, mu zola tuba, ya kuvwanda kuna, na mwa echarpe na zulu ya dipeka ya yandi. Mpe mosi ya bandimi ya yandi, na bamvula makumi yivwa na zole, ya vwandaka kaka na mayele mpe kikesa, mpe Pentecotiste tii na mikwa, yandi vwandaka kuna, beno zaba. Mpe mu tubaka, “Beno zaba samu na yinki beno biboba me vwanda awa? Beto ke vingila masuwa kukwisa baka beto.” Yimeni. Bisalu ya bawu, nionso yina ba me sala, ba me sala kosalu mosi, ba me kubama ntangu yayi na kukwenda na ndandu ya bawu.

³⁵ Mpe mu tubaka na Mpangi Chev, ti Mpangi Kidson . . . Kidd, na suka yina, “Nge ke vwanda na lukutakanu ya Chautauqua.”

³⁶ Yandi bokilaka munu mazono, yandi tubaka, “Mu ke . . . Mu ke vwanda kuna, Mpangi Branham.” Ya ke mbote.

³⁷ Mingi ya bantu na lukutakanu, kele mbuma ya ministere ya munu ya malu-malu. Mpangi-bakala mosi, mpangi-bakala mosi ya Baptiste yina me telema awa, mwana ya yandi ya kento, ya bamvula kati-kati, vwandaka mwa kimpumbulu. Mpe mu tubaka na yandi, “Mu ke pesa nge mwana ya nge ya kento samu na Mfumu Yesu,” na suka yina. Mpe ntangu yandi kwendaka na yinzo, yandi me vuluka. Mpe yina yankaka kele awa na suka yayi, samu na kubaka mbotika mpe ya ke landila.

³⁸ Mpe bakala mosi, Tata Sothmann, nkundi ya munu ya Canada, bokilo ya yandi ke pene ya kufwa, mu tubaka, “Nge ke mona bokilo ya nge ntangu ke kuma kuna, na mavimpi ya mbote, na nzutu ke vutukila mavimpi ya yawu, mbote mingi.” Ya vwandaka kaka mutindu yina. Mpe kaka . . . bantu ke na kukota. Ya ke kaka na mbandukulu ya yawu ntangu yayi, ya me banda na kusala. Kasi, oh, beto ke na kuingila ya mingi, ya kulutula mingi na zulu ya nionso. Beto me kuma na bantangu ya yimbi mpe na bilumbu ya nsuka, kasi na ngunga mosi ya nkembo.

³⁹ Ntangu yayi beno ke na ba-Biblia ya beno, samu na kutanga, Samuel kapu 8? Mpe mu silaka Gene na kuvwanda kuna na manima, samu na kukanga yayi me bikala na bande. Beto me banda kaka, lukutakanu ya beto.

Na yina bantu mangaka na kutumama na ndinga ya Samuel; mpe bawu tubaka, Ve; kasi beto ke vwanda na ntinu mosi na zulu ya beto;

Ti beto . . . ke vwanda mutindu . . . yinsi, bayinsi nionso; mpe ti ntinu ya beto lenda sambisa beto, mpe

yandi ke twadisa beto, mpe yandi ke nwana bitumba ya beto.

. . . Samuel kuwaka mambu yayi nionso ya bantu, mpe . . . yandi vutukilaka yawu na makutu ya MFUMU.

Mpe MFUMU tubaka na Samuel, Wa ndinga ya bawu, mpe sadila bawu ntinu. Mpe Samuel tubaka na bantu ya Israel, Beno kwenda konso muntu na mbanza ya yandi.

⁴⁰ Ntangu yayi kana mu lendaka meka na kupona kubanda na yayi, na suka yayi, yina mu ke bokila dilongi, na mwa minuti ke kwisa, mu ke pona dilongi yayi: *Ntinu Me Losama.*

⁴¹ Ya vwandaka na ntangu mosi, mutindu bantangu nionso, yina bantu zolaka ata fioti ve ti Nzambi kutwadisa bawu. Ba ke zola lutwadusu ya mutindu ya bawu mosi. Mpe disolo ya suka yayi . . . Mpe ntangu beno ke kwenda na bayinzo ya beno, ya ke vwanda mbote samu na beno na kutanga yawu nionso tii na nsuka. Ya vwandaka na ntangu ya bilumbu ya Samuel, muntu ya Nzambi, profete. Mpe yandi vwandaka kaka muntu, mpe muntu mosi ya mbote, ya luzitu, ya lukumu, ya kieleka mpe ya kuvedila na ntwala ya bantu, yandi vunaka bawu ata fioti ve, mpe yandi tubaka na bawu kima yankaka ve kasi kaka MUTINDU ME TUBA MFUMU.

⁴² Kasi bantu kumaka na kisika yina bawu zolaka kusoba manaka yayi. Bawu talaka ba-Philistin, mpe ba-Amalécites, ba-Amoréen, ba-Hethien, mpe bayinsi yankaka ya yinza, mpe bawu monaka ti ba vwandaka na bantinu yina vwandaka kuyala na zulu ya bawu, mpe vwandaka tumika bawu, mpe vwandaka twadisa bawu, mpe vwandaka twadisa bitumba ya bawu, mpe nionso yina. Mpe yayi monanaka ti Israel zolaka kulanda mbandu ya bantinu yayi, mpe bantu yayi.

⁴³ Kasi ya me vwandaka ata fioti ve, ata na mbandu mosi ve, dibanza ya Nzambi ti bantu ya Yandi kuzinga mutindu bantu ya yinza, to ba tumika bawu to ba twadisa bawu mutindu bantu ya yinza. Bantu ya Nzambi, ntangu nionso, ke vwandaka bantu ya mutindu yankaka, bantu ya luswaswanu, bantu yina ba me bokila na kubasika, bantu yina me kabwana, mpe bantu ya kuswaswana na bisalu ya bawu, na mutindu ya bawu, na mutindu ya bawu ya kuzinga, na bantu ya yinza. Bansatu ya bawu, mpe nkadulu ya bawu nionso, vwandaka ntangu nionso ya kuswaswana na nsatu ya bantu ya yinza.

⁴⁴ Mpe bantu ya Israel kwisaka na Samuel mpe tubaka, “Ntangu yayi, nge me nuna, mpe bana ya nge ya babakala ke na kutambula ve na bitambi ya nge.” Na yina, bawu kele ya kusungama ve mutindu Samuel. Ba vwandaka baka makabu mpe vwandaka baka mbongo. Mpe bawu tubaka, “Samuel, bana ya nge ya babakala ke mutindu nge ve, na yina beto zola ti nge

kwenda sosila beto ntinu mosi, mpe pakula yandi, mpe sala beto bantu mutindu bantu yankaka ya yinza.”

⁴⁵ Mpe Samuel mekaka na kutuba na bawu ti ya lenda salama ve. Yandi tubaka, “Kana beno sala mutindu yina, kima ya ntete beno zaba, beno ke mona ti yandi ke basisa bana ya beno ya babakala na yinzo ya beno, mpe yandi ke sala bawu basoda, samu bawu kwenda mbangu na ntwala ya pusu ya yandi, mpe bawu baka minduki mpe bampele. Yina kaka ve, kasi yandi ke baka bana ya beno ya bakento, samu na kusala bawu misadi ya mampa, mpe ke botula beno bawu, samu na kudisa basoda. Mpe,” yandi tubaka, “na nganda ya nionso yina, yandi ke lomba beno mwa bampaku, na bankuna ya beno, mpe bimvwama ya beno nionso. Yandi ke lomba mpaku na nionso yina, yina ke kotisa kizunga na bamfuka, mpe nionso yina, yina ba fwana kufuta.” Yandi tubaka, “Mu banza ti, beno nionso, ke na kusala kifu.” Kasi ntangu . . .

⁴⁶ Bantu yango tubaka, “Kasi beto ke zola vwanda kaka mutindu bantu yankaka.” Ya ke na kima mosi samu na babakala na bakento, ti bawu zola kufwanakana mosi na yankaka. Mpe ya ke kaka na muntu mosi yina zingaka na zulu ya ntoto yina vwandaka mbandu ya beto, mpe yina vwandaka Mosi yina kufwaka samu na beto nionso, Mfumu ya beto mpe Mvulusi, Yesu Klisto. Yandi vwandaka mbandu ya kulunga ya yina beto fwana vwanda, ntangu nionso na bisalu ya Tata mpe vwandaka sala yina kele mbote.

⁴⁷ Mpe ata yinki mutindu Samuel mekaka na kundimisa bantu, ba vwandaka kaka na manima ya yandi, kilumbu mpe mpimpa, “Beto zola ntinu. Beto zola muntu. Beto zola muntu yina beto lenda tuba, ‘Yayi kele ntwadisi ya beto.’”

⁴⁸ Mpe yina vwandaka ata fioti ve luzolo ya Nzambi. Ya vwandaka ata fioti ve luzolo ya Nzambi, to ya ke vwanda ata fioti ve luzolo ya Nzambi, ti bantu kuyala na zulu ya bamosi mpe bayankaka. Nzambi ke yalaka na zulu ya muntu. Nzambi kele Mfumu ya beto, Ntinu ya beto.

⁴⁹ Mpe ya ke kifwani ya kieleka, na yina ya bubu yayi, samu ya ke monana ti muntu kele diaka na dibanza yina. Ba ke monana ti ba lenda bakula ve ti ya ke kaka Nzambi ke yala na zulu ya muntu, na kisika ya muntu kuyala na zulu muntu.

⁵⁰ Na yina ba ponaka bawu mosi muntu mosi na nkumbu ya Saul, yina vwandaka mwana ya Kish. Mpe yandi vwandaka muntu ya lukumu, muntu ya luzitu. Kasi yandi vwandaka sepelisa bantu mingi, samu yandi vwandaka muntu ya nene, ya yinda, ya lukumu, na ntela ya mbote. Masonuku me tuba ti yandi vwandaka na zulu ya bantu nionso na Israel. Yandi vwandaka na nkadulu ya ntinu na kutala, mpe yandi vwandaka kitoko na kizizi. Yandi vwandaka muntu ya mayele mpe muntu ya kulutila nene.

⁵¹ Ntangu yayi, yawu yina mutindu ya muntu yina bantu ke zolaka kupona bubu yayi. Ya ke monana ti bantu ke sepelaka ve na mutindu yina Nzambi me tulaka Dibuundu ya Yandi, samu na kuyalama mpe kutwadisama na Mpeve-Santu. Ba ke zolaka ti ya vwanda muntu, muntu mosi, denomination mosi, mwa bantu samu na kuyala Dibuundu. Ti, bawu lenda ve bawu mosi na kukiyambula ya muvimba na diboko ya Nzambi, samu na kuvwanda ya kimpeve, samu na kutwadisama na Mpeve-Santu. Ba ke zolaka muntu mosi samu na kusadila nsambulu ya bawu na kisika ya bawu, ti muntu mosi kutuba na bawu wapi mutindu kusadila yawu, mpe nionso yina.

⁵² Na yawu ya monanaka ti muntu yayi vwandaka ya kulunga na kisika yina, samu yandi vwandaka muntu ya mayele mingi.

⁵³ Mpe ya me fwanakana na yina ke salama bubu yayi. Beto ke zola kupona bantu ya mutindu yina, mpe, samu na kuyala mabuundu ya beto, samu na kuyala Dibuundu ya Nzambi. Mu ke na diambu ya kutuba ve samu na kutelemina yawu, kasi ya ke kaka samu na kutuba, ti: ya kele ve, ya vwandaka ve, mpe ya ke vwanda ata fioti ve luzolo ya Nzambi, ti mambu kusalama mutindu yina. Nzambi fwana kuyala bantu ya Yandi, kuyala muntu nionso.

⁵⁴ Na yina beto ke mona ti mwana yayi ya Kish, muntu ya nene, mpe—mpe ntela ya yandi, mpe yandi. . . Yandi monanaka muntu ya kulunga samu na bantu, ti robe ke simba yandi mbote-mbote. Mpe yimpu ya kimfumu na zulu ya yintu ya yandi, ya ke lutila bantu nionso, ntangu yandi ke tambula, yandi lendaka vwanda muntu ya kieleka samu na kimfumu ya Israel. Na yina, bantinu yankaka lendaka, na bayinsi yankaka, lendaka banza, “Beno tala muntu yina!” Wapi mutindu ba ke songa musapi ya bawu mpe ke tuba, “Beno tala awa, beto me kuzwa ntinu ya nene! Beno tala muntu ya nene ke yala na zulu ya beto!”

⁵⁵ Mpe ya ke kiadi na kutuba, kasi wapi mutindu ya ke kieleka bubu yayi na dibuundu, ba ke zolaka kutuba, “Pasteur ya beto ke muntu ya mabanza ya kukangama ve. Yandi ke muntu ya nene. Yandi ke na diplome ya Hartford,” to ya lukolo mosi ya nene ya théologie. “Yandi ke na ba-diplome yiya ya kisika *kingandi*. Mpe yandi me zabana mingi na kati ya bantu.” Nionso yina lendaka vwanda mbote mingi, mpe fwana vwanda na kisika ya yawu. Kasi mutindu ya Nzambi kele ti Dibuundu ya Yandi kutwadisama na Mpeve-Santu, mpe na Mpeve ya Yandi.

⁵⁶ Kasi ba ke zolaka kutuba ti, “Beto kele bandimi na denomination yayi ya nene. Beto me banda kubanda ntama na bilumbu ya ba-pionnier, ntangu beto vwandaka bantu fioti, bantu fioti mingi, mpe bantu fioti. Mpe ntangu yayi beto me kula tii na kisika yina beto me kuma na ba-denomination ya kulutula nene. Beto ke na balukolo ya kulutula, mpe balongi ya kulunguka mingi. Beto ke na nkonga ya bantu ke lwataka mbote. Mpe bantu

ya kulonguka mingi na kati ya mbanza ke kotaka denomination ya beto. Mpe beto ke kabisaka mpasi na bantu. Mpe beto ke salaka mambu ya mbote, mpe nionso yina.” Mpe mu ke tuba kima mosi ve, Nzambi kukeba munu, na kutuba dyambu mosi samu na kutelemina yawu, samu nionso yina kele mbote.

⁵⁷ Kasi, na yina, ya ke luzolo ya Nzambi ve ti muntu kuyala na zulu ya muntu yankaka. Nzambi fidisaka, na Kilumbu ya Pentecote, Mpeve-Santu samu na kuyala ntima ya konso muntu, mpe kuyala na luzingu ya yandi. Ya me pesama muswa ve na muntu na kuyala na zulu ya muntu yankaka.

⁵⁸ Kasi beto ke zolaka kutuba mutindu yina. Ya ke kima mosi ya bufanatiki na ntangu beto lenda tuba ti beto kele bandimi ya organisation ya nene.

⁵⁹ “Nge kele Muklisto?” Yawu yina mu bakaka masonama yayi, ntangu mu vwandaka na lupitalu. Mpe kana mu lendaka yufula muntu mosi, “Nge kele Muklisto?”

“Mu kele mundimi ya dibuundu *kingandi*.”

“Nge kele Muklisto?”

“Mu kele mundimi ya dibuundu *kingandi*.”

⁶⁰ Mpe infirmière mosi kwisaka na lweka ya mbeto, kisika mu vwandaka tanga Biblia, mpe yandi vwandaka infirmière yina me katuka kukuma ya malu-malu na étage. Mpe yandi tubaka, “Mbote.” Yandi tubaka, “Mu ke kwikila ti nge ke Révérend Branham, nge kele awa samu na kizame ya nzutu.”

Mu tubaka, “Yinga.”

⁶¹ Mpe yandi tubaka, “Mu lenda nika nge na mukongo, samu nge kuwa mwa madidi na alkole?”

Mpe mu tubaka, “Nge lenda sala yawu.”

⁶² Mpe ntangu yandi vwandaka nika yawu na mukongo ya munu, yandi tubaka, “Yinki kele denomination ya nge?”

⁶³ Mpe mu tubaka, “Oh, mu kele mosi ya denomination ya ntama mingi.”

Mpe yandi tubaka, “Wapi denomination yawu kele?”

⁶⁴ Mu tubaka, “Ya ke yina ba yidikaka na ntwala ba yidika yinza.”

⁶⁵ Mpe, “Oh,” yandi tubaka, “yinki? Mu ke kwikila ve ti mu me zaba yawu.” Yandi tubaka, “Mu kele mosi ya dibuundu *kingandi*. Ya kele organisation yina?”

⁶⁶ Mu tubaka, “Ve, mama. Ya me lungisa kaka bamvula nkama zole, organisation yango. Kasi organisation yayi kubandaka ntangu bambwetete ya suka vwandaka yimbila kintwadi, mpe bana ya Nzambi bokaka na kiese, ntangu bawu monaka nkwezulu ya Mvulusi samu na kukuula bantu ya yinza.”

67 Mpe yandi bikaka na kunika mukongo ya munu. Mpe mu vwandaka ya kubaluka fioti, mutindu *yayi*, samu mama yango kunika munu. Mpe yandi vwandaka ya Corydon, ntama ve na awa. Beto vwandaka solula. Mpe yandi tubaka, “Tata, mu ke kwikilaka ntangu nionso ti kana Nzambi keke Nzambi, Yandi keke kaka Nzambi, bubu *yayi*, kaka mutindu Yandi vwandaka na bilumbu na bilumbu me luta.” Yandi tubaka, “Ata ti dibuundu ya munu ke mangaka yawu, kasi mu ke kwikila ti ya keke Kieleka.”

68 Mpe mu tubaka, “Nge ke ntama ve na Kimfumu ya Nzambi, ntwenia ya kento.”

Yandi tubaka, “Kana Yandi vwandaka munganga, Yandi ke kaka munganga ve?”

Mu tubaka, “Ya keke ya kieleka, mpangi ya munu ya kento.”

69 Kasi muntu ke zolaka kuyala, mpe kuyala na zulu ya muntu. Mpe muntu ke zolaka ti muntu kuyala yandi. Yandi ke zolaka ve ti Nzambi kuyala.

70 Na yina mwana *yayi* ya Kish, Saul, nkumbu ya yandi, vwandaka mvutu na yina bawu zolaka, muntu ya ntela ya nene. Mpe. . . Oh, yandi lendaka twadisa bawu na bitumba ya bawu, mpe nionso yina. Kasi, na yina, ya vwandaka ve mutindu ya Nzambi ya kusala mambu. Nzambi zolaka ti kiboba ya profete ya Yandi ya kwikama kutwadisa bawu, mpe kuzabisa bawu Bandinga ya Yandi.

71 Ntangu *yayi*, bubu *yayi*, na kati ya nsungi ya dibuundu ya beto ya nene yina beto ke na kuzinga, beto, mu banza, mpe mu ke kwikila na ntima ya munu ya muvimba, ti beto me sala mambu ya kuswaswana na yina Nzambi tumaka beto na kusala. Bandinga ya nsuka ya Mvulusi ya beto vwandaka na Marc 16. Ya tubaka:

Beno kwenda na yinza ya muvimba, samu na kumwangisa nsangu ya mbote na bantu nionso.

Yandi yina ke kwikila mpe ke baka mbotika yandi ke kuzwa mpulusu; . . . yandi yina ke kwikila ve ke kuzwa kitumbu.

Bayina ke kwikila ke vwanda na bidimbu yayi; Na nkumbu ya munu ba ke basisa bampeve ya yimbi; ba ke tuba na ndinga ya malu-malu;

Mpe kana bawu simba banioka; to . . . kunwa . . . bima ya yimbi, ya ke sala bawu yimbi ve; mpe kana bawu . . . tetika maboko ya bawu na zulu ya bambevo, . . . ba ke beluka.

72 Ya keke na muntu ve, ya keke na mwana ya Kish ve, to muntu yankaka ve, yina lenda sala yawu kukondwa lutwadusu ya Mpeve-Santu. Kasi beto me sala balukolo, beto me sala baseminere, mpe beto me sala ba-organisation, samu—samu na kukisepelisa, mpe kufwanakana na yinza.

⁷³ Ntangu yayi, Mpeve-Santu vwandaka ntete Ntwadisi na yinsi yayi. Yinsi yayi vwandaka ntete na nsi ya luyalu kuna na ntangu. . . ntangu ba sonikaka nsamunu yayi ya kimpwanza. Mpe ya vwandaka na kiti yankaka kuna. Ya ke na ntembe ve mabanza ya munu kasi Mwana ya Nzambi vwandaka na mesa yina, ntangu yinsi yayi vwandaka ya kutungama na zulu ya misiku ya kimpwanza ya nsambulu mpe kimpwanza samu na nionso, mpe na zulu ya Ndinga ya Kukonda nsuka ya Nzambi.

⁷⁴ Kasi beto me bebisa yawu. Polititiki; beto me pona bantu kuna, na nzila ya kusumba mpe kuteka, mpe na kupesaka bansilupe ya luvunu. Tii kuna. . . Yinsi ya beto, ba-politiki ya beto, mpe democratie ya beto, me kubeba mingi ti ya me—ya me vukana kuna na kati na communisme mpe ba-isme ya mutindu na mutindu.

⁷⁵ Mpe na bantangu mingi beto ke bandaka lukutakanu na kisambu, ntangu kompani ya bayinsi ke vukana, mpe kuna. . . to ba ke baka balukanu. Mpe na ntangu mosi, na ntangu mosi ya mfunu, ntama ve, ya vwandaka na mfunu ya kusambila ve ata mbala mosi ve. Wapi mutindu beto ke sungika baluswaswanu ya beto kukondwa kusambila? Wapi mutindu beto lenda vingila, na yinza ya movimba, na kusala kima mosi kukondwa lutwadusu ya Mpeve-Santu?

⁷⁶ Kasi beno bika mu tuba mutindu yayi na zola mpe luzitu samu na yinsi ya beto mpe dalapo ya yawu, mpe samu na république yina ya ke talisa: Beto me losa Ntwadisi ya beto, Mpeve-Santu, mpe na nzila ya politiki beto me kotisa bantu ya mabanza ya kubeba. Mpe kana beno sala keba ve, ba ke sala mosi ya bifu ya kulutula nene ba me salaka ntete ve, ntangu yayi, samu bantu ke zolaka muntu kuyala.

⁷⁷ Yina beto ke na yawu nsatu na capitole ya Etats-Unis yayi, mutindu ntwadisi ya yinsi, yina beto ke na yawu nsatu na Congrès, yina beto ke na yawu nsatu na ba-tribunal, kele bantu yina me kaba baluzingu ya bawu na Nzambi, mpe bayina me fuluka na Mpeve-Santu, mpe me twadisama na lutwadusu ya Yandi na Kinzambi. Kasi, na kisika ya yawu, beto me pona bantu ya mayele, bantu yina ke na “mitindu ya nganda ya bunsambi, mpe ke manga ngolo ya Nzambi,” bantu yina ke kwikilaka na Nzambi ve, mpe na bantangu yankaka bantu ya yimbi mingi kulutula yina, beto me kotisa bawu na mambu ya politiki, ya yinsi ya beto.

⁷⁸ Yina kaka ve, kasi na kati ya mabuundu ya beto. Mabuundu ya beto me kuma ya kubeba na mutindu ti beto, na ntangu ya kuona mivungu ya beto samu na kutwadisa beto, beto me kwenda na ba-seminere mpe beto me soola bantu me longukaka mingi, bantu yina ke na mayele mingi na yintu, bantu yina ke na ndwenga, mpe ba me zabana mingi na kati ya bantu, mpe bantu ya nene na quartier, yina mu ke tuba diambu ya yimbi ve samu

na bawu. Bantu yina ke na lutondo na ndiatulu ya bawu, yina ke na nkebolo na mutindu ya bawu ya kuzinga, mpe mutindu ba ke zingaka na kati ya bantu yankaka, mpe na kati ya bantu, bantu ya nene na bizunga ya bawu, yina mu ke tuba diambu ya yimbi ve samu na bawu. Nzambi kukeba mpeve ya munu na kuvwanda na musoki samu na yawu. Kasi, na yina, ya kele ve yina Nzambi ponaka samu na beto.

⁷⁹ Ya ke lutwadusu ya Mpeve-Santu: Klisto na kati ya bantima ya bantu. Mingi ya bantu yina ya mayele ke telemaka na chaire ke mangaka luzingu ya kieleka ya Mpeve-Santu. Mingi kati ya bawu ke mangaka luzingu ya kubeluka ya Kinzambi mpe Ngolo ya Mpeve.

⁸⁰ Mu vwandaka tanga zulunale mosi, mazono, mu ke kwikila, bandandani ya bitini ya bazulunale ya Jack Coe, Jack Coe yina me kufwaka, . . . mosi ya bandimi ya munu na Mfumu Yesu, yina vwandaka munwani-mvita ya nene, na bilumbu ya yandi. Mpe ba bokilaka yandi na yinzo ya lusambusu, kuna na Floride, samu yandi tubaka na mwana mosi ya ntwenia na kukatula appareil orthopédique na makulu ya yandi, mpe yandi tambula kuna na estrade. Mpe na ntangu yandi salaka mutindu yina, mwana yango kutambulaka kuna na estrade, mbote-mbote, mpe yandi kubwaka na ntangu yandi kumaka pene-pene ya mama ya yandi. Nionso yina vwandaka manaka ya yimbi ya mbeni ya Klisto, kento yayi ya ntwenia na bakala ya yandi nataka mpangi ya beto ya bakala ya kikesa na ba-tribinal ya yinsi.

⁸¹ Mpe na yina mabuundu nionso lendaka sadisa Mpangi Jack, na yina bantu nionso ya dibuundu yina ke tangaka Nkumbu ya Yesu Klisto lendaka vwanda na lweka ya yandi, na kikesa nionso, bantu nionso yina ke bokilaka Nkumbu ya Mfumu Yesu lendaka kubwa na makulu ya bawu na kisambu, kasi, na kisika ya yina, yina vwandaka na bisono ya nene na bazulunale, mosi ya badenomination ya beto ya nene tubaka ti ba me vukana na bantu yina ke kwikilaka na Nzambi ve, samu na kufundisa, na boloko Mpangi Jack Coe. Beno lenda banza ti dibuundu mosi, yina ba ke bokila bawu mosi Nkumbu ya Klisto, lendaka vukana na muntu yina ke kwikilaka na Nzambi ve, samu na kufundisa muntu ya santu yina vwandaka meka na ntima ya yandi ya muvimba samu na kunwanina Biblia? Kasi ba salaka yawu.

Na yina Mpangi Gordon Lindsay kwisaka na lusadusu.

⁸² Mpe na ntangu zuzi yayi ya mumpani tubaka, “Muntu kele muntu ya luvunu samu yandi me katula appareil orthopédique na mwana yina mpe ya me tinda yandi kuna na estrade, mpe yandi tubaka ti ya me ‘beluka.’ Mpe yandi me tuba luvunu, mpe yandi me sala diambu yina me telemina balutumu ya dokotolo, na yina yandi me lukusu na ntuala ya yandi.”

⁸³ Mpe Tata Coe telemaka, mpe yandi tubaka, “Tata, mu ke manga diambu yina. Nzambi me belusa mwana-bakala yina.”

84 Mpe zuzi tubaka, “Mu ke yufula muntu nionso yina ke na kati ya tribunal yayi kana diambu yina lendaka vwanda kieleka, ti Nzambi lendaka belusa mwana-bakala yina na nsongi ya estrade yayi, mpe kubika yandi na kimbevo na nsongi yina yankaka. Kana diambu lenda siamisama na Biblia, na yina mu ke tuba Tata Coe keke ya kusungama samu na diambu ya yandi.”

85 Mpe longi mosi telemisaka diboko ya yandi, mpe yandi tubaka, “Lukumu na nge, tata, mu lenda tuba yawu?”

Mpe zuzi tubaka, “Tuba yawu.”

86 Mpe longi yango kutelemaka, mpe yandi tubaka, “Na mpimpa mosi, na kati ya nzadi, ntangu mwa bwatu yina zolaka kudinda, ata kivuvu mosi ya kuzinga vwandaka ve. Bawu monaka Yesu, Mwana ya Nzambi, ke kwisa na zulu ya masa. Mpe mosi ya bantumwa, na nkumbu ya Pierre, tubaka, ‘Kana yina keke Nge, Mfumu, tuma na muni na kukwisa kuna na Nge na zulu ya masa.’” Mpe yandi tubaka, “Mfumu tubaka na ntumwa Pierre, ‘Kwisa.’ Mpe yandi basikaka na bwatu, tata, yandi tambulaka na zulu ya masa mutindu Yesu, kutambulaka na zulu ya masa. Kasi ntangu yandi monaka boma, yandi bandaka na kudinda ntete yandi kuma na Yesu.”

Zuzi tubaka, “Diambu me suka.”

Beto ke na nsatu ya lutwadusu ya Mpeve-Santu, bantu ya mayele ve.

87 Saul, mwana ya Kish, kumaka mfumu na zulu ya bantu, mpe yandi bakaka bantu mafunda zole, mpe Jonathan bakaka funda mosi. Mpe Jonathan kulumukaka na yinzo ya basoda mpe yandi kufwaka nkonga ya ba-Amoréen, ba-Ammonite, mu zola tuba. Mpe ntangu—ntangu yandi kufwaka bawu, Saul bulaka mpungi, mpe yandi tubaka, “Beno tala yina Saul me sala.” Yandi bandaka na kuvimba na lulendo.

88 Kana muntu me kuma Docteur ya nene ya Théologie, to ya ke na mwa kima mosi na nsongi ya nkumbu ya yandi, yandi ke banda, kuyika ve kukatula ve, muntu me zaba nionso.

89 Bantu ya Nzambi keke bantu ya kukikulumusa. Bantu ya Nzambi keke bantu ya kukikulumusa. Kana beno me mona bantu yina ke tuba ti ba me kuzwaka Mpeve-Santu, mpe bawu kubanda na kukabwana na beno, ya ke monana ti, ba ke na Lukwikilu ve, ba ke kwenda kuna, ba ke meka na kuvwanda yina bawu keke ve, beno bambuka moyo, ba me yambaka Mfumu Yesu ve.

90 Na manima beto ke mona ti mbeni kumaka. Mpe yandi zolaka kunwanisa mwa nkonga yayi ya bantu ya Nzambi, mpe zolaka kukatula disu ya kibakala na bantu nionso.

91 Yawu yina mbeni ke mekaka na kusala ntangu nionso, kukatula bawu meso nionso zole, kana ya lenda salama, Na mutindu ti bantu lendaka mona ve yina ba ke na kusala. Yawu

yina Satana ke mekaka na kusala bubu yayi na konso Muklisto, kukatula yandi disu ya kimpeve, na mutindu ti yandi lendaka landa kaka sense ya mayele ya bima, na kisika ya sense ya Mpeve-Santu yina ke twadisaka yandi.

⁹² Na yawu na ntangu bawu salaka mutindu yina, ntangu kubwa ya nene kwisaka, na yina Saul zengaka bangombe zole ya babakala mpe yandi tindaka yawu na bantu nionso. Mpe mu zola ti beno zaba diambu yayi, ntangu Saul tindaka bitini ya bangombe na Israel ya muvimba, mpe yandi tubaka, “Muntu nionso yina ke landa ve Samuel mpe Saul, bika ti yandi, ngombe yayi, kuvwanda mutindu *yayi*.” Beno me mona luvunu yina yandi mekaka na kutalisa ti yandi vwandaka tambula kintwadi na muntu ya Nzambi? Mutindu—mutindu ya vwandaka kukondwa buklisto! Samu bantu vwandaka na boma ya Samuel. Kasi Saul salaka ti bawu nionso kulanda yandi samu bantu vwandaka na boma ya Samuel. “Bawu kulanda Samuel *na* Saul.”

⁹³ Mpe bambala yikwa, bubu yayi, beto me kuwa yawu! “Beto ke Dibuundu ya nene. Beto ke Dibuundu ya Klisto. Beto ke Dibuundu ya Nzambi. Beto ke *kingandi*.” Yawu yina ke nataka boma na kati ya bantu, mpe ba ke banza ti ya ke kisika yina Nzambi ke na kusalaka. Mpe ba ke zolaka ve lutwadusu ya Mpeve-Santu. Ba ke zolaka kulanda bantu ya mutindu yina, samu ba ke zolaka kuzinga luzingu ya bawu mosi. Ba ke zolaka kukwikila yina ba ke zolaka kukwikila.

⁹⁴ Beno me mona? Mpeve-Santu kele Zuzi. Nzambi pesaka beto pape ata fioti ve, to évêque, to muntu mosi, samu na kuvwanda Zuzi. Mpeve-Santu, Muntu ya Nzambi, na mutindu ya Mpeve-Santu, kele Zuzi ya beto mpe Ntwadisi ya beto. Ntangu yayi, samu na yinki mambu yayi?

⁹⁵ Beno lemvo kila munu samu na nzonzolo yayi ya nganzi, ya nganzi mingi. Mu ke tuba yawu samu na kuvwanda na musoki. Mu ke tuba yawu na zola.

⁹⁶ Kasi Mpeve-Santu me tuba ti ya ke yimbi samu na bakento ya beto na kuzengisa bansuki ya bawu. Mpe ya ke kifu samu na bakento ya beto na kulwata mwa bakupe mpe ba-pantaloni, mpe kutula maquillage na bikobo ya bawu mpe bizizi ya bawu. Mpeve-Santu me tuba ti ya ke yimbi.

⁹⁷ Kasi beto ke zolaka bantu kutuba na beto yina kele mbote, “Ntangu nionso beto ke landa munu na Samuel.” Ba ke zolaka kuzinga na bilumbu sambanu, na mutindu ba me zola, mpe kukwenda na yinzo-Nzambi na Lumingu na suka. Mpe muntu mosi ya kulonguka mingi na ba-diplome mingi kulonga na bawu mwa dilongi mosi yina ke . . . na mwa bansaka, yina ke vwanda mbote na makutu ya bawu mpe yina ke sepelisa bawu, mutindu mwa film mosi to manaka ya télévision. Mpe ya ke sala mwa kisambu samu na bawu, mpe ya ke vutula bawu na

bayinzo konso muntu na mwa nsayi ya lukengolo ti ba me sadila nsambulu ya bawu. Yina ke luzolo ya Mpeve-Santu ve.

⁹⁸ Mpeve-Santu ke zolaka ti beno zinga na busantu, bilumbu nionso na kati ya sabala, mpe konso mpimpa, na kukabwana beno mosi na bima ya yinza.

⁹⁹ Kasi dibuundu ke zolaka yina ve. Ba ke zolaka bantu yina lendaka—yina lendaka tendula Biblia na mutindu yina ba ke zolaka kuwa Yawu. Ba ke zolaka ve kuwa Ndinga ya Mpeve-Santu kutuba na nzila ya Biblia. Bantu mingi ke zolaka kutuba, “Bilumbu ya bimangu me lutaka.” Yawu yina ke sepelisaka bantu. Ba ke zolaka kutuba, “Mbotika ya Mpeve-Santu ke vwandaka ve.” Bantu ke zolaka ve kuzinga ya kuswaswana na bantu yankaka ya yinza. Ba ke zolaka ve kubasika na bala-bala na bizizi ya bawu ya kusukula, mpe—mpe bantu na nkadulu ya mbote, kukondwa makaya na yinwa ya bawu, mpe—mpe fumu, mpe kinzu, mpe—mpe mambu yina bantu ke salaka. Mpe bakento ke zolaka kuzengisa bansuki ya bawu nkufi mingi, mpe—mpe kulwata ba-robe ya nkufi, mpe kutalisa banzutu ya bawu, mpe mambu yina ba ke zolaka. Ba—ba ke zolaka bantu yina ke tuba na bawu, “Ya ke mbote mingi.”

¹⁰⁰ Na manima, na nkokila yina, muntu mosi kwisaka tuba na munu, ti samu mu me longa samu na kutelemina mambu yina, ti denomination mosi, pene ya tanu na kati ya bawu, tubaka, “Beto ke kubwisa Mpangi Branham mpe beto ke vwanza diaka ve na kima ya kusala na yandi. To nge ke bika ba-bande yina, mpe nge ke lomba pardo samu na yawu, to beto ke kubwisa nge.”

¹⁰¹ Mu tubaka, “Mu ke kangama na Ndinga ya Nzambi. Kana ya ke lomba munu bima nionso mu ke na yawu na luzingu ya munu, mu ke bikala na Ndinga. Mpe mu . . .”

Yandi tubaka, “Mbote, nge lenda katula ve bande *kingandi*?”

¹⁰² Mu tubaka, “Mu me longaka ata fioti ve kima mosi, na luzingu ya munu, yina mu me vwanza na nsoni ya yawu. Mu ke katula ata bande mosi ve to ata diske mosi ve. Mu ke bikala na yina Mpeve-Santu me tuba. Ti mu ke zinga mpe mu ke kufwa na yawu.” Mu ke meka ve na kutuba samu na munu mosi kuna. Kasi mu ke meka na kupesa nge kifwanikisu ya yina ke na kusalama, na mutindu beno kumona mpe beno kubakula. Ya kele bantu ke zolaka kutwadisama na bantu.

¹⁰³ Bawu zolaka Samuel ve. Na yina na ntwala ba pakula Samuel ntinu. . . to Saul, ntinu, beno lemvo kila munu, Samuel diaka na bawu. Mpe mu ke tuba kaka na mutindu yina yandi lendaka tuba yawu bubu yayi. Beno lendaka kutanga yawu. Yandi tubaka, “Yinki ke sala beno mpasi ti Nzambi kuvwanda Ntinu ya beno?”

“Mbote, beto ke monaka Nzambi ve.”

104 “Mbote, mu ke mutadisi ya Yandi,” Samuel tubaka, “mu me tubaka na beno ntete diambu ya luvunu? Mu me pesaka beno ntete profesi ya diambu yina me salamaka ve mutindu mu tubaka yawu? Mu me tubaka na beno ve Ndinga ya Mfumu? Mpe mu ke yufula beno mutindu yayi: Mu me kwisaka na beno samu na kulomba beno mbongo? Mu me bakaka ntete kima mosi na beno? Mu me natilaka beno ntete kima yankaka na nganda ya MUTINDU ME TUBA MFUMU? Mpe Nzambi me siamisaka yawu, konso ntangu, ti ya vwandaka Kieleka.” Mpe Yandi fidisaka banzani mpe bamvula (Beno zaba Masonuku, beno, kuna.) samu na kusiamisa ti Samuel vwandaka yinwa ya Nzambi.

105 Mpe Samuel talisaka na mutindu ya kulunga: Bubu yayi, Mpeve-Santu— Mpeve-Santu kele yinwa ya Nzambi: ya ke tuba kieleka yina Biblia me tuba; yina ke kwikila kaka yina Biblia me tuba, mpe ya ke kwenda na lweka ya Yawu ve, ata fioti.

106 Kasi bawu zolaka muntu yina lendaka tuba na bawu diambu yankaka. Mpe bantu lendaka tuba ve ti profesi ya Samuel vwandaka ya kulunga ve. Ba pesaka mvutu mpe tubaka, “Samuel, nionso ya nge me tubaka na Nkumbu ya Mfumu, Mfumu me lungisaka yawu kaka mutindu nge tubaka. Ya ke na kifu mosi ve. Nge me kwisaka na beto ata fioti ve samu na kulomba beto mbongo. Nge mosi ke bakaka kizitu ya nge. Nge me lombaka na beto ata fioti ve, kima mosi ya nene mingi samu na nge. Nge ke tulaka kivuvu na Nzambi, mpe Yandi me kuulaka nge na bima nionso. Mpe bandinga ya nge kele ya kieleka. Mambu nionso nge me tubaka na Nkumbu ya Mfumu me salamaka kaka mutindu nge tubaka. Kasi beto me zola ntinu.”

107 Beno me mona luswaswanu? Beno—beno lenda mona mayele ya yimbi ya diabulu, mutindu ya lenda sala na muntu? Na kisika ya kukipesa yandi mosi bakala to kento na Mpeve-Santu, samu na kuwa MUTINDU ME TUBA MFUMU, samu na kuvwanda luzingu ya kuvedila, kikalulu ya kukondwa mvindu, samu na kuvwanda na luzingu ya luswaswanu, samu na kuvwanda bantu ya kuswaswana, yinsi ya santu, bantu ya luzingu ya ngitukulu; bawu zolaka kufwanakana na yinza, mpe kuzinga mutindu yina, mpe kukwenda na mabuundu yina ke tubaka, “Ya ke mbote mingi, sala kaka mutindu yina mpe landila kaka mutindu yina.”

108 Beno lenda mona yina ya kele? Ba ke tuba, “Kubeluka ke vwandaka ve. Oh, mbotika ya Mpeve-Santu vwandaka dikunzi ya dibuundu.” Na nzonzolo yankaka, na manima Nzambi bakaka bantu, katulaka Mpeve-Santu na dibuundu, mpe me bika denomination kutunga yawu. Ata fioti ve, ata fioti ve. Ya ke na diambu ya mutindu yina ve. Mpeve-Santu, Ndinga ya Kieleka, lendaka twadisa beno tii kuna Yesu ke kwisa. Kasi ya—ya vwandaka salama mutindu yina.

109 Saul kotaka na kimfumu. Yandi . . . Yandi kuzwaka kimvuka ya nene ya bantu. Oh, yandi vwandaka na makesa ya kitoko. Yandi vwandaka na bayimbi. Yandi vwandaka na ba-bouclier, mpe yandi vwandaka na bampele. Oh, yandi vwandaka pesa ntitisa na bayinsi yankaka nionso. Mpe yandi nataka bawu na démocratie yina vwandaka na zulu ya nionso yina ba me monaka na ntswala.

110 Mpe ya ke kaka mutindu ba-denomination ya beto mpe mabuundu ya beto me sala bubu yayi. Beto ke na mabuundu ya kulutula nene na yinza. Beto ke na bantu yina ke lwataka mbote mingi na yinza. Beto ke na bantu ya ndwenga mingi yina lendaka vwanda.

111 Mutindu bantu ya Saul yina ba longusaka yina lendaka baka mpele yina, mpe ba lendaka telemisa yawu mpe kubalula yawu na mutindu ti bayinsi vwandaka na boma ya bawu. Ba vwandaka bantu yina ba me longusa, mpe nionso yina. Kasi, kilumbu mosi, na ntangu mosi muntu mosi kwisaka kutula na bawu ntembe. Mpe makesa ya muvimba ya Israel vwandaka na boma na mutindu ti ba vwandaka tekita na kati ya basapatu ya bawu. Goliath tulaka na bawu ntembe, “Kana Nzambi ya beno kele yina beno ke tuba ti Yandi kele! Ba me longusaka beno mbote.” Mpe yandi tulaka na bawu ntembe. Bawu zabaka ve yinki kusala. Binkuti ya bawu ya kisengo ya kitoko, ya kuyidika mbote lendaka sala ve. Bampele ya bawu lendaka sala ve. Ya vwandaka kima yina ba me monaka ntete ve, na ntswala, yina vwandaka salama.

112 Mpe na nzitusu nionso mpe luzitu ya busantu, lukumu mpe buzitu, zola mpe kubundana ya Buklisto, mu ke tuba mutindu yayi: Mu tangaka, kilumbu yina, na zulunale ya Afrique, ti mwana ya beto ya Kish, munwani-mvita ya beto ya kumwangisa nsangu, ntangu Musulman mosi tulaka na yandi ntembe, Billy Graham. Yandi tubaka, “Kana Nzambi ya nge kele Nzambi, bika Yandi belusa bambevo mutindu Yandi tubaka ti Yandi ke sala.” Mpe mwana ya Kish, na makesa nionso, vwandaka swi mpe bikaka yinsi, ya kunungama. Ya kele nsoni. Nzambi ya beto kele Nzambi.

113 Beto ke na mabuundu ya beto ya mbote. Beto ke na mutindu ya mbote ya kumwangisa nsangu. Beto ke na bayimbi ya beto ba ke futaka mbongo. Beto ke na ba-chorale ya kulutula mbote, beto ke na bampele ya zulu mingi na kati ya yinsi. Beto ke na bantu ya kulutula mbote, bantu ya mbongo mingi. Beto ke na bantu ya kulonguka. Beto ke na théologie ya zulu mingi; beto lenda longa yawu; beto lenda zabisa yawu. Beto lenda mwangisa nsangu mpe kukotisa bantu, mpe mafuku ya bandimi, konso mvula, na dibuundu ya beto. [Kisika ya mpamba na bande—Mu.] Bayimbi ya beto ba ke futaka mbongo, mutindu ya beto ya mayele ya kumwangisa nsangu, kuzaba ve wapi mutindu kununga ntembe

ya mutindu yina. Ba me zaba kima mosi ve samu na yawu. Ba me zaba kima mosi ve samu na ngolo ya Yandi ya kubeluka ya nzutu, ya mbotika ya Mpeve-Santu, ya ngolo yina lendaka simba muntu yina zola kufwa na cancer, mpe kupesa yandi kimpwanza. Ba me zaba kima ve samu na yawu. Ba me longusaka bawu ve na lweka yina, mutindu Saul mpe kimvuka ya yandi me salama na bantu kuvwandaka.

¹¹⁴ Kasi beno bika mu tuba na bantu ya Nzambi, mpe na beno bana, ti beno fwana zaba ti Nzambi ke bika beno ata fioti ve kukondwa mhangi mosi.

¹¹⁵ Saul, kuzabaka ve, Saul zabaka kima mosi ve samu na yawu. Kasi Nzambi vwandaka na David ya fioti kuna na manima ya mingo kisika mosi kuna, yina vwandaka kudisa ve mameme na matiti ya yimbi ya mabuundu. Yandi vwandaka twadisa bawu na bamasa ya pima mpe matiti ya mubisu. Yandi vwandaka na kizitu na ntima samu na mameme ya tata ya yandi. Mpe kana kima mosi kukota, mbeni mosi, samu na kukanga mosi ya mameme ya tata ya yandi, yandi zabaka ngolo ya Nzambi samu na kunwanina dimeme yina.

¹¹⁶ Nzambi kele diaka na David, kisika mosi kuna, yina zaba yina zola kututa kunwanina mameme ya Nzambi, na nzila ya ngolo ya Nzambi. Yandi kuzaba yawu ntangu nionso.

¹¹⁷ Yandi vwandaka na kivuvu. Yandi zabaka kima mosi ve samu na kinkuti ya kisengo ya Saul, to yandi zolaka yawu ve. Yandi vwandaka na kima ya kusala ve na ba-denomination ya bawu. Yandi zolaka ve kulwata kinkuti ya kisengo ya ntama. Yandi tubaka, “Mu zaba kima mosi ve samu na yawu. Kasi bika mu kota na ngolo yina mu me zaba.” Yandi vwandaka kudisa mameme ya tata ya yandi. Yandi vwanda keba na matiti. Yandi vwanda pesa bawu madia ya mbote, mpe bawu vwandaka kuzinga mpe vwandaka kukula.

¹¹⁸ “Muntu ke zinga kaka na dimpa ve. Kasi na Ndinga nionso ke basika na yinwa ya Nzambi, muntu ke zinga.” Muvungi ya kieleka ke disaka bawu. “Yesu Klisto mutindu mosi mazono, bubu yayi, mpe kukonda nsuka.” Mpe kana mbeni kukanga mosi, na kimbevo, yandi zaba ngolo ya Nzambi.

¹¹⁹ Beno tala mwa David yayi, yandi telemaka kuna. Yandi tubaka, “Mwana-bakala yina kele munwani-mvita, kubanda kubutuka ya yandi. Mpe kubanda buleke ya yandi, yandi me zaba kima yankaka ve kasi mpele na kinkuti ya kisengo. Yandi me longusamaka mbote. Yandi kele théologien. Mpe beno zaba kima mosi ve samu na yawu.”

¹²⁰ Yandi tubaka, “Ya kieleka, tata. Mu zaba kima mosi ve samu na malongi ya yandi ya théologie. Kasi mu me zaba kima mosi, ti, ntangu mbeni kukotaka, samu na kubaka mosi ya mameme ya tata ya munu, mu kwendaka na ngolo ya Nzambi. Mu kangulaka

yandi. Mu vutulaka yandi diaka na lukengolo na mavimpi ya mbote. Mu vutulaka yandi na matiti ya mubisu mpe bamasa ya pima. Mpe Nzambi yina kukangulaka munu na maboko ya nkosi, mpe mu kufwaka yandi ntangu yandi bakaka mosi ya banamameme, mpe Yandi salaka ti mu kufwa ulusu, mutindu mosi Nzambi ya Mazulu ke kwenda na munu samu na kufwa Philistin yina ba me zengaka bubakala ve.”

Beto ke na nsatu ya lutwadusu ya Mpeve-Santu. Mu zaba ve bilumbu ya munu; muntu mosi ve kuzaba yawu.

¹²¹ Na suka yina mu vwandaka ya kutandama na mbeto. Mpe mu vwandaka . . . mu vwandaka ya kulala, mpe mu lotaka ti Joseph vwandaka ya kubela, mpe mu zangulaka yandi na kusambila samu na yandi. Mpe ntangu mu vumbukaka, mu vwandaka ya kuyangama mingi. Mu tubaka, “Mbote, mu banza ti Joseph ke bela.”

¹²² Mpe mu monaka, na ntwala ya munu, mwa kivudi mosi, ya ndombe, ya tinta mosi ya kufwanana fioti na café. Mpe ya monaka ti ya vwandaka munu. Mpe mu vwandaka tala yawu. Mpe Muntu mosi na mpembe vwandaka kulanda yawu, mpe ya vwandaka Yandi. Mu balulaka meso na kento ya munu, samu na kutala kana yandi vwandaka me vumbuka, ti mu lendaka talisa yandi, ya lendaka mona vision yango. Kasi yandi vwandaka ya kulala.

¹²³ Mu tubaka, “Oh, mawa na munu, Mfumu. Kasi, yina ke luzingu ya munu. Nge lendaka twadisa munu na bima nionso yina mu salaka. Konso ntangu konso kima yina ke salama, mu ke banza ti ya vwandaka Nge muntu salaka yawu. Mpe mu me bakula ti ya vwandaka Satana yina vwandaka meka na kunata munu ntama na yawu.” Mu tubaka, “Kana Nge lendaka twadisa munu kaka.” Mpe mutindu mu vwandaka kutala, mu monaka kizizi ya kulutila kitoko mu monaka ntete ve na bakala mosi. Yandi vwandaka na ntwala ya munu, ke kutala na manima. Yandi telemisaka diboko ya Yandi mpe simbaka diboko ya munu, mpe bandaka kutambula mutindu *yayi*. Vision bikaka munu. Lumingu me luta na suka, mu vwandaka, me vumbuka na suka-suka. Ya vwandaka na Kilumbu ya sambanu, vision yayi. Na . . .

¹²⁴ Mu vwandaka ntangu nionso na boma, mu vwandaka banza ntangu nionso ti mu ke kufwa. Yawu, mu ke na bamvula makumi tanu, ya ke, ntangu ya munu kele ve . . . mu banzaka ve ti mu ke baka ntangu ya yinda. Mpe mu vwandaka kukiyufula yina mu ke vwanda na théophanie yina, nzutu yina ya mazulu. “Ya lendaka vwanda ti mu ke mona bampangi ya munu ya luzolo mpe, mu tuba, mwa kiula ya mpembe, mpe mu ke tuba, ‘Yina Mpangi Neville,’ to, yandi lendaka tuba ve, ‘Mbote, Mpangi Branham?’ Mpe ntangu Yesu ke kwisa, na yawu mu ke vwanda diaka muntu.” Mu vwandaka banza kaka mutindu yina.

¹²⁵ Mu lotaka ti mu vwandaka kuna na Weste. Mpe mu vwandaka luta na mwa kilanga mosi ya armoise, mpe kento ya munu vwandaka na munu, mpe beto kwendaka loba truite. Mpe mu telemaka mpe—mpe mu zibulaka mwelo. Mpe matuti vwandaka kitoko mingi. Ya vwandaka mutindu mosi na lubwaku awa. Ya vwandaka bule, mpe matuti ya mpembe ya kitoko. Mpe mu tubaka na kento ya munu, mu tubaka, “Beto zolaka kwiza awa, bilumbu yina lutaka, cherie.” Yandi tubaka, “Samu na bumbote ya bana, beto zolaka vwanda, Billy.” Mu tubaka, “Ya ke . . .” Mpe mu vumbukaka.

¹²⁶ Mu banzaka, “Mu ke na kulotaka mingi! Mu ke kukiyufula samu na yinki.” Mpe mu kulumusaka meso, mpe yandi vwandaka ya kulala pene-pene ya munu.

¹²⁷ Mpe mu telemaka na kuse ya munu, mutindu mingi na kati ya beno me salaka yawu, mu tulaka yintu ya munu na zulu ya yintu ya mbeto, mpe mu tulaka maboko na manima ya munu. Mpe mu vwandaka ya kulala kuna mutindu *yayi*. Mpe mu tubaka, “Mbote, mu ke kukiyufula yina ya ke vwanda, na simu yina yankaka. Mu kele na bamvula makumi tanu yimeni, mpe mu me sala ntete kima mosi ve. Kana mu lendaka sala kima mosi samu na kusadisa Mfumu, samu mu zaba ti mu ke kufwa diaka ve. Kati-kati ya ntangu ya munu me kwenda, na kutala, to kulutula kati-kati. Kana mu ke zinga samu na kuvwanda kiboba mutindu bantu ya munu, mu ke kaka na kati-kati ya ntangu ya munu me kwenda.” Mpe mu vwandaka tala nziunga-nziunga. Mpe mu vwandaka ya kulala kuna, mu vwandaka kubama samu na kuvumbuka. Ya vwandaka pene ya ngunga sambwadi. Mu tubaka, “Mu ke kwikila ti mu ke kwenda na yinzo-Nzambi, na suka yayi. Ata ti kikongolo ya munu me kangama, mu ke zola kuwa Mpangi Neville kulonga.”

¹²⁸ Na yawu mu tubaka, “Nge me vumbuka, cherie?” Mpe yandi vwandaka ya kulala mingi.

¹²⁹ Mpe mu zola ve ti beno kondwa yayi. Ya sobaka munu. Mu lenda vwanda diaka ve Mpangi Branham yina mu vwandaka.

¹³⁰ Mpe mu talaka. Mpe mu kuwaka Kima mosi, ke landila na kutuka, “Nge ke kaka na mbandukulu. Landila kaka na kunwana. Landila kaka na kukwenda na ntuala.”

¹³¹ Mu ningisaka fioti yintu ya munu. Mu banzaka, “Mbote, mu banza ti ya ke munu ke banza mutindu yayi.” Beno zaba, ya lenda salama ti muntu kubanza mambu. Mpe mu tubaka, “Mu me banza yawu kaka.”

Ya tubaka, “Landila kaka na kunwana. Landila kaka na kukwenda. Landila kaka na kukwenda.”

¹³² Mu tubaka, “Mbala yankaka mu me tuba yawu.” Mpe mu tatikaka bikoba ya munu, mpe mu tulaka diboko na zulu ya yinwa ya munu.

133 Mpe Ya kwisaka diaka, mpe tubaka, “Landila kaka na kukwenda na ntwala. Kana nge zabaka kaka yina ke na nsuka ya nzila!”

134 Mpe ya monanaka ti mu vwandaka kuwa Graham Snelling, to muntu yankaka, kuyimbila nkunga yina mutindu yayi (Ba ke yimbaka yawu awa, Anna Mae mpe beno nionso.):

Mu ke na mpasi na ntima mpe kiadi, mpe mu zola mona Yesu.

Mu zola kuwa bangelele ya muningu ya lembami ya lukengolo.

Nzila ya munu ke sema mpe boma ya munu nionso ke zimbana.

Mfumu, bika mu tala na simu yina ya rido ya ntangu.

Beno me kuwaka kuyimba yawu awa na yinzo-Nzambi.

135 Mpe mu kuwaka Kima mosi kutuba, “Nge zola mona na simu yina yankaka ya rido?”

Mu tubaka, “Ya ke sadisa munu mingi.”

136 Mpe mu talaka. Na mwa ntangu fioti, mu . . . na kupema mosi mu me kota na mwa Kisika yina ya pente. Mu balulaka meso, mpe mu vwandaka kuna, ya kulala na mbeto. Mpe mu tubaka, “Yayi ke kima mosi ya ngitukulu.”

137 Ntangu yayi, mu zola ve kuvutukila yayi. Ya ke na ntwala ya dibuundu ya munu, to mameme ya munu yina mu kele pasteur mu ke tuba yayi. Kana mu vwandaka, mu vwandaka na nzutu yayi to na nganda ya yawu, kana ya vwandaka nsobolo mosi, ya vwandaka ve mutindu vision yankaka nionso mu me kuzwaka. Mu lendaka tala Kuna, mpe mu lendaka tala awa.

138 Mpe ntangu mu kumaka na mwa Kisika yina, mu me monaka ata fioti ve bantu mingi mutindu yina ke baka mbangu, ke boka, “Oh, mpangi ya beto ya ntalu!”

139 Mpe mu talaka. Mpe bakento ya bantwenia, mu banza na mbandukulu ya bamvula makumi zole, kubanda kumi na nana na makumi zole, ba vwandaka lemuka munu na nkingu, mpe ke boka, “Mpangi ya beto ya ntalu!”

140 Kuna kwisaka babakala ya bantwenia, na kikesa ya buntwenia ya bawu. Mpe meso ya bawu vwandaka ngenga mpe fwananaka na bambwetete na kati ya mpimpa. Meno ya bawu ya mpembe mutindu palata. Mpe ba vwandaka boka, mpe vwandaka yamba munu, mpe vwandaka boka, “Oh, mpangi ya beto ya ntalu!”

141 Mpe mu telemaka, mpe mu talaka. Mpe mu vwandaka ntwenia. Mu balulaka meso na nzutu ya munu ya kununa ya kulala kuna, na maboko na manima ya yintu ya munu. Mpe mu tubaka, “Mu ke bakula yayi ve.”

142 Mpe bakento yina ya bantwenia vwandaka lemuka munu na nkingu. Ntangu yayi, mu me bakula ti ya ke na babakala na bakento awa, mpe mu ke tuba yayi na lembami mpe na lutondo ya Mpeve. Bakala lendaka yamba kento mosi ve kukondwa kuvwanda na nsatu ya nzutu; kasi Kuna ya vwandaka ve. Ya vwandaka na mazono ve to mbasi ve. Ba vwandaka kulemba ve. Ba vwandaka . . . Mu me monaka ata fioti ve bakento ya kitoko mutindu yina na luzingu ya munu ya muvimba. Ba vwandaka na bansuki ya kukulumuka tii na luketo, na ba-jupe ya yinda tii na makulu ya bawu. Mpe ba vwandaka kuna ke yamba munu. Ya vwandaka ve kubumbasana mutindu mpangi ya munu mosi ya kento, yina me vwanda kuna, lendaka bumbasana na munu. Ba vwandaka fiba munu ve, mpe mu vwandaka fiba bawu ve. Ya vwandaka kima yina mu—mu ke na vocabulaire ve, mu ke na bampova ve samu na kutuba yawu. “Ya kulunga” lendaka simba na yawu ve. “Ya kitoko mingi” lendaka mpe kusimba na yawu ve, ata kisika mosi ve. Ya vwandaka kima mosi yina ata fioti ve mu . . . Beno fwana vwanda kaka Kuna.

143 Mpe mu talaka mutindu *yayi*, mpe mutindu *yina*. Mpe ba vwandaka kwisa, mafunda. Mpe mu tubaka, “Mu ke bakula yayi ve.” Mu tubaka, “Mbote, bawu . . .”

144 Mpe Hope kwisaka. Yina vwandaka kento ya munu ya ntete. Yandi kwisaka mbangu, mpe yandi tubaka ata fioti ve, “Bakala ya munu.” Yandi tubaka, “Mpangi ya munu ya ntalu,” mpe yandi bumbasanaka na munu. Ya vwandaka na kento yankaka ya kutelema kuna, yina bumbasanaka na munu, mpe na manima Hope bumbasanaka na kento yayi; mpe mosi na yankaka. Mpe mu banzaka, “Oh, ya ke vwanda na kima mosi ya luswaswanu. Ya lendaka vwanda ve . . . Ya ke kima mosi . . .” Mu banzaka, “Oh, mu ke zola diaka kuvutuka na nzutu yina ya ntama?”

145 Mu talaka nziunga-nziunga. Mu banzaka, “Yayi kele yinki?” Mpe mu talaka, na bukebi nionso. Mpe mu—mu tubaka, “Mu—mu lenda bakula yayi ve.” Kasi Hope monanaka mutindu, oh, munzenza ya lukumu. Yandi vwandaka ya kuswaswana ve na bayankaka, kasi ya vwandaka kaka mutindu munzenza ya lukumu.

146 Mpe mu kuwaka Ndinga mosi yina tubaka na munu, kuna na kati ya kivinga, ya tubaka, “Yayi kele yina nge longaka vwandaka Mpeve-Santu. Yayi ke Zola ya kulunga. Mpe kima mosi ve lenda kukota Awa kukondwa Yawu.”

147 Mu me ndima ya kieleka, ti mu me vwandaka ata fioti ve mutindu yina na luzingu ya munu, ti ya ke lomba Zola ya kulunga, samu na kukota Kuna. Ya vwandaka na nkele ve. Ya vwandaka na kulemba ve. Ya vwandaka na lufwa ve. Kimbevo lenda kukota Kuna, ata fioti ve. Lufwa; lendaka—lendaka ata fioti ve kununisa beno. Mpe . . . Ba lendaka kuboka ve. Ya vwandaka kaka kiese.

148 “Oh, mpangi ya munu ya ntalu!” Mpe ba zangulaka munu, mpe tulaka munu na kisika mosi ya zulu mingi.

149 Mu banzaka, “Mu ke na kulota ve. Mu balukaka mpe mu monaka nzutu ya munu—ya munu ya kutandama kuna na zulu ya mbeto.”

150 Mpe ba zangulaka munu kuna. Mpe mu tubaka, “Oh, mu lendaka vwanda awa na zulu ve.”

151 Mpe kuna kwisaka bakento na babakala, na balweka nionso zole, kaka na buntwenia ya bawu, ke boka. Mpe kento mosi vwandaka ya kutelema kuna, mpe yandi vwandaka kuboka, “Oh, mpangi ya munu ya ntalu! Oh, beto ke na kiese mingi na kumona nge Awa.”

Mu tubaka, “Mu ke bakula yayi ve.”

152 Mpe kuna Ndinga yina vwandaka tuba, na zulu ya munu, tubaka, “Nge zaba, ya me sonamaka na kati ya Biblia ti ba yambaka bapofete na bantu ya bawu.”

Mpe mu tubaka, “Yinga. Mu ke bambuka moyo na yawu na kati ya Masonuku.”

Ya tubaka, “Mbote, yayi ke ntangu nge ke kutana na bantu ya nge.”

Mu tubaka, “Na yina ba ke vwanda bantu ya kieleka, mpe mu lendaka simba bawu.”

“Oh, yinga.”

153 Mu tubaka, “Kasi, ya ke na mafuku. Ya ke na ba-Branham mingi ve mutindu yayi.”

154 Mpe Ndinga yina tubaka, “Ba ke ba-Branham ve. Ba ke bandimi ya nge. Bayina nge twadisaka na Mfumu.” Mpe tubaka, “Bakento yankaka kuna, yina nge ke mona kitoko mingi, vwandaka na bamvula kulutula makumi yivwa na ntangu nge twadisaka bawu na Mfumu. Kuyituka ve ba vwandaka kuboka, ‘Mpangi ya beto ya ntalu!’”

155 Mpe ba vwanda boka, bawu nionso na mbala mosi, bawu tubaka, “Kana nge ndimaka ve na kukwenda, beto zolaka vwanda Awa ve.”

Mu talaka nziunga-nziunga. Mu banzaka, “Mbote, mu ke bakula yawu ve.”

Mu tubaka, “Oh, wapi Yesu? Mu zola mona Yandi, na nsatu mingi.”

156 Bawu tubaka, “Ntangu yayi, Yandi ke na mwa zulu mingi, na lweka yina.” Ya tubaka, “Kilumbu mosi Yandi ke kwisa na nge.” Beno me mona? Ya tubaka, “Ba tindaka nge, mutindu ntwadisi. Mpe Nzambi ke kwisa. Mpe ntangu Yandi ke kwisa, Yandi ke sambisa nge landila yina nge longaka bawu, ntete, kana ba ke kota to ve. Beto ke kota landila malongi ya nge.”

157 Mu tubaka, “Oh, mu ke na kiese mingi. Paul, ba ke sambisa yandi mutindu yayi? Ba ke sambisa Pierre mutindu yayi?”

“Yinga.”

158 Mu tubaka, “Na yawu mu longaka Ndinga nionso yina bawu longaka. Mu me kwendaka na lweka ya Yawu ata fioti ve, na lweka mosi to yankaka. Kisika ba botikaka na Nkumbu ya Yesu Klisto, mu salaka mutindu mosi. Kisika ba longaka mbotika ya Mpeve-Santu, mu salaka mutindu mosi. Nionso yina ba longaka, mu salaka mutindu mosi.”

159 Mpe bantu yina bokaka, mpe bawu tubaka, “Beto me zaba yawu. Mpe beto zaba ti beto ke vutuka na nge, kilumbu mosi, na zulu ya ntoto.” Bawu tubaka, “Yesu ke kwisa, mpe ba ke sambisa nge landila Ndinga yina nge longaka beto. Na manima kana ba me ndima nge na ntangu yina, nge ke vwanda mutindu yina,” Mpe ba tubaka, “na manima nge ke talisa beto na Yandi, mutindu ba-trophée ya ministere ya nge.” Bawu tubaka, “Nge ke twadisa beto na Yandi, mpe, beto nionso kintwadi, beto ke vutuka na zulu ya ntoto, samu na kuzinga mvula na mvula.”

Mu tubaka, “Mu fwana vutuka ntangu yayi?”

“Yinga. Kasi landila kaka na kukwenda na ntwala.”

160 Mu talaka. Mpe mu lendaka mona bantu, ntama mingi na munu, ba vwandaka kwisa, ba vwandaka zola kubumbasana na munu, ba vwandaka boka, “Mpangi ya beto ya ntalu!”

161 Na manima Ndinga mosi tubaka, “Bayina nionso nge ke zolaka, mpe bayina nionso ke zolaka nge, Nzambi me pesa bawu na nge Awa.” Mpe mu talaka. Mpe kuna kwisaka yimbwa ya munu ya ntama, yina vwandaka kwisa. Kuna kwisaka mpunda ya munu, mpe tetikaka yintu ya yandi na zulu ya mapeka ya munu, mpe vwandaka dila. Ya tubaka, “Bayina nionso nge ke zolaka, mpe bayina nionso ke zolaka nge, Nzambi me pesa bawu na maboko ya nge, na nzila ya ministere ya nge.”

Mpe mu bakulaka ti mu me katuka na Kisika yina ya kitoko.

162 Mpe mu talaka nziunga-nziunga. Mu tubaka, “Nge me vumbuka, cherie?” Yandi vwandaka kaka ya kulala.

163 Mpe mu banzaka, “O Nzambi! Oh, sadisa munu, O Nzambi. Kubika munu ata fioti ve mu kakula Ndinga mosi. Bika mu kangama kaka na Ndinga yayi, mpe mu longa Yawu. Mu ke kipe ve yina ke kwisa to ke salama, yina muntu yankaka ke sala; ba-Saul yikwa . . . bana ya Kish yikwa ke telema, yikwa *yayi, yina*, to *yankaka*. Bika munu, Mfumu, mu landila kaka na kukwenda Kisika yina.” Boma nionso ya lufwa . . .

164 Mu ke tuba mutindu yayi, na Biblia ya munu na ntwala ya munu, na suka yayi. Mu ke na mwana-bakala ya fioti kuna, ya bamvula yiya, ya kusansa. Mu ke na mwana-kento ya bamvula yivwa; mpe ntwenia mosi ya kento, mu ke vutula matondo, samu

ba me ndima na kulanda Mfumu. Nzambi, bika munu kuzinga, samu na kulongusa bawu landila Nzambi.

¹⁶⁵ Mpe na zulu ya yina, makelele yinza ya muvimba ba me ludika yawu na munu, bakento na babakala ya bamvula makumi yivwa, mpe nionso yina, “Kana nge ndimaka ve na kukwenda, beto zolaka vwanda Awa ve.”

¹⁶⁶ Mpe, Nzambi, bika mu landila kaka na kunwana. Kasi kana ya ke lomba lufwa, mu ke na kiadi ve. Ya ke vwanda kiese, ya ke vwanda nsayi, na kukatuka na kubeba yayi mpe nsoni, samu na kukota kuna.

¹⁶⁷ Kana mu lendaka sala, kuna, nkama mosi ya mafuku ya mafunda ya yinda, bloc mosi ya karé, mpe ya ke vwanda Zola ya kulunga, na konso kitambi na lweka yayi, ya ke fiotuka, tii kuna beto ke kuma kisika yina beto kele na ntangu yayi. Ya ke vwanda kaka kivudi mosi ya kubeba, mwa kima yina ya fioti beto lendaka zabisa beto na ntwala mpe kutalisa beto ti ya ke na kima mosi kisika mosi kuna. Beto zaba ve yina Yawu kele.

¹⁶⁸ Oh, bankundi ya munu ya ntalu, bankundi ya munu ya luzolo, ba-cheri ya munu ya Nsangu ya mbote, bana ya munu mu me buta samu na Nzambi, beno kuwa munu, pasteur ya beno. Beno, kana mu vwandaka na mutindu ya kutendula yawu na beno. Ya ke na bampova ve; mu lendaka mona yawu ve; ba ke kuzwa yawu kisika mosi ve. Kasi kaka na zulu kupema yayi ya nsuka, ya ke na kima mosi ya nkembo mingi yina beno ata fioti ve. . . Ya ke na mutindu ya kutendula yawu ve. Ya ke na mutindu ve. Mu lenda sala yawu ve. Kasi nionso yina beno ke sala, bankundi, beno tula bima nionso yankaka na lweka tii kuna beno ke kuzwa Zola ya kulunga. Beno kuma na kisika yina beno lenda zola bantu nionso, bambeni nionso, mpe nionso yankaka.

¹⁶⁹ Nzietolo mosi Kuna, samu na munu, me sala munu muntu ya luswaswanu. Mu lenda vwanda ata fioti ve, ata fioti ve, ata fioti ve Mpangi Branham yina mu vwandaka. Ata ti bavungu kuningana, ata ti ya ke na bansemu ya banzasi, ata ti mulangididi kuludika mundika na ntwala ya munu, ya vwanda konso kima yina, ya ke na mfunu ve. Mu ke landila kaka na kunwana, na lemvo ya Nzambi. Na yina, mu me longa Nsangu ya mbote na bivungu nionso mpe na bantu nionso yina mu lendaka kulonga, na kundimisaka bawu na kukwenda na Yinsi yina ya kitoko kuna.

¹⁷⁰ Ya lendaka monana ngolo. Ya lendaka lomba ngolo mingi. Mu zaba ve bantangu yikwa diaka. Beto zaba ve, na nzonzolo ya kimuntu. . . . Landila kizame ya munu ya kilumbu yina, yandi tubaka, “Nge ke diaka na bamvula makumi zole na tanu ya luzingu ya kikesa, ya mbote. Nge ke na mavimpi ya mbote.” Yina sadisaka munu. Kasi, oh, ya vwandaka yawu ve. Ya vwandaka yawu ve. Ya ke kima mosi na kati *awa*. Nzutu yayi ya kubeba

fwana kulwata kukondwa kubeba. Nzutu yayi ya lufwa fwana kulwata yina ke kufwaka ve.

¹⁷¹ Bana ya Kish lendaka telema. Munu...Bima nionso ya mbote ba ke sala, mu ke tuba diambu ya yimbi ve samu na yawu, ba ke pesaka na bamputu mpe ke salaka mambu ya lutondo. Mpe beno bambuka moyo, na yina, Samuel tubaka na Saul, “Nge ke pesa mpe profesi.” Mpe mingi ya bantu yina kele milongi ya nene, ya ngolo, ba lendaka longi Ndinga mutindu archange. Kasi ya vwandaka luzolo ya Nzambi ve. Nzambi vwandaka ntinu ya bawu. Mpangi-bakala, mpangi-kento, beno bika Mpeve-Santu kutwadisa beno.

Beto kulumusa bayintu ya beto na mwa ntangu fioti.

Mu ke na mpasi na ntima mpe kiadi . . . mu zola mona Yesu,

Mu zola kuwa bangelele ya muningu ya lembami ya lukengolo;

Nzila ya munu ke sema mpe boma ya munu nionso ke zimbana;

Mfumumu, bika beto tala na simu yina ya rido ya ntangu.

Mfumumu, bika mu tala na simu yina ya kiadi mpe ya boma,

Talisa munu yinsi yina ke ngenga na nsemo;

Lukwikilu ya beto ke kuma ngolo mpe boma ya beto ke zimbana;

Mfumumu, bika mu tala na simu yina ya rido ya ntangu.

¹⁷² Mu me ndima ya kieleka, Mfumumu, kana mwa dibuundu yayi, na suka yayi, lendaka tala kaka na simu yina yankaka ya rido: ya ke vwanda na bampasi ve na kati ya bawu, ya lendaka vwanda ata fioti ve; ata kimbevo ve; kima yankaka ve kasi mambu ya kulunga. Mpe Ya ke kaka na kupema mosi kati-kati ya awa mpe Kuna, katuka na kinunu tii na buntwenia, katuka na ntangu tii na Seko, katuka na minianga ya mbasi, mpe kiadi ya mazono, tii na ntangu yayi ya Seko na yina ya kulunga.

¹⁷³ Mu ke sambila, Nzambi, ti Nge ke sakumuna muntu nionso awa, kana ya ke na bayina awa, Mfumumu, yina me zaba Nge ve na mutindu yina ya Zola. Mpe ya kieleka, Tata, kima mosi ve lendaka kukota na Kisika yina ya santu kukondwa mutindu yina ya Zola, Lubutuku ya malu-malu, kubutuka mbala ya zole. Mpeve-Santu, Nzambi, kele Zola, mpe beto zaba ti yina kele kieleka. Kima mosi ve ata ti beto ke katula miongo na lukwikilu, kana beto salaka mambu ya nene, kasi, kukondwa Yina kuna, beto lendaka kumata ata fioti ve na kikalu yina ya nene kuna. Kasi na Yina, Ya ke zangula beto na zulu ya minianga ya ntoto yayi. Mu ke sambila, Tata, ti Nge ke sakumuna bantu yayi awa.

174 Mpe bika, ti, muntu nionso yina me kuwa munu, na suka yayi, kutuba Kieleka yayi, ti Nge vwanda mhangi ya munu, Mfumu, mutindu Samuel ya kiboba, “Mu me tubaka na bawu ntete kima mosi na Nkumbu ya Nge yina vwandaka kieleka ve?” Bawu mosi kele bazuzi. Mpe mu ke tuba na bawu ntangu yayi, Mfumu, ti Nge nataka munu na Yinsi yina. Mpe Nge zaba ti ya kele kieleka.

175 Mpe ntangu yayi, Tata, kana ya ke na bayina me zaba Nge ve, bika ti yayi kuvwanda ngunga yina ba ke tuba, “Mfumu, tula na kati ya munu luzolo ya kuvwanda landila luzolo ya Nge.” Pesa yawu, Tata.

176 Mpe ntangu yayi, beno, na bayintu ya beno ya kukulumusa, beno zola telemisa maboko ya beno, mpe kutuba, “Sambila samu na munu, Mpangi Branham, luzolo ya Nzambi na kati ya munu.”

177 Ntangu yayi na ntangu beno kele kisika yina beno kele, kaka na lembami ya kieleka, samu na yinki beno lenda tuba ve na Tata, “Nzambi, na kati ya ntima ya munu, bubu yayi, mu me yambula mambu nionso ya yinza. Mu me yambula mambu nionso, samu na kuzola Nge mpe kusadila Nge, luzingu ya munu ya muvimba. Mpe mu ke, kubanda bubu yayi, na ntangu yayi, landa Nge, na kati ya Masonuku ya Biblia ya Nge?” Kana beno me bakaka ntete ve mbotika ya mbotika ya Buklisto, “Mu ke sala yawu, Mfumu.”

178 “Kana mu me kuzwaka ntete ve Mpeve-Santu. . .” Beno ke zaba ntangu beno kuzwaku Yawu. Ya ke pesa na beno—Ya ke pesa na beno kivuvu mpe Zola yina beno ke na yawu mfunu. Oh, ya lendaka vwanda ti beno me sala mambu ya mutindu na mutindu, beno vwandaka na ba-sensation, mumbandu beno kubokaka to beno tubaka na bandinga ya malu-malu, yina kele mbote. Kasi kana Zola yina ya Kinzambi kele kuna ve, beno kwikila munu ntangu yayi, beno tuba, “Mfumu, tula na kati ya ntima ya munu, mpe na kati ya moyo ya munu, bisalu ya Mpeve ya Nge, ti mu fwana zola, mpe kupesa lukumu mpe kuvwanda na Zola yina ya Kinzambi na kati ya ntima ya munu, bubu yayi, yina ke nata munu na Yinsi yina ntangu pema ya munu ya nsuka ke bika munu,” na ntangu beto ke sambila. Beno sambila, beno mosi, ntangu yayi. Na mutindu ya beno mosi, beno sambila, beno lomba na Nzambi na kusala yawu samu na beno.

179 Mu zola beno. Mu zola beno. Beno babakala ya ntalu na bansuki ya mpembe yina me vwanda awa, beno me sala ngolo samu na kudisa bana ya fioti! Beno bamama ya bamputu, ya biboba yina me kusumuna masa ya meso na meso ya bawu! Beno bika mu siamisa na beno yayi, mpangi-kento, ya luzolo, ya ke mutindu yina ve na simu yina ya yankaka na pema yina kuna. Mu ke kwikila ti ya kieleka Ya ke na kati ya kivinga yayi. Ya ke kaka na kitezo yina beto ke na kuzinga awa. Yayi ke kaka kubeba wapi beto ke na kuzinga ntangu yayi.

¹⁸⁰ “Kasi tula na kati ya munu, Mfumu, luzolo ya kuvwanda landila luzolo ya Nge.” Beno sambila, na ntangu beto ke sambila kintwadi.

¹⁸¹ Na luzitu nionso, Mfumu, na kutulaka kivuvu na zulu ya Ndinga ya Nge mpe Mpeve-Santu ya Nge, beto ke na kiese mingi ti beto me zaba kisika Lubutuku ya beto me katuka. Beto ke na kiese ti beto me “butuka ve na luzolo ya muntu, to na luzolo ya nzutu, kasi na luzolo ya Nzambi.”

¹⁸² Mpe beto ke sambila, bubu yayi, Tata, samu na bantu yayi ke na kulomba lemvo ya pardo, ti Mpeve ya Nge kusala kusalu, Mfumu. Mu ke na mutindu ya kusala yawu ve; mu ke kaka muntu, mwana yankaka ya Kish. Kasi beto ke na nsatu ya Nge, Mpeve-Santu.

¹⁸³ Nzambi, bika mu vwanda mutindu Samuel, muntu yina ke tubaka Kieleka ya Ndinga. Mpe Nge me siamisa Yawu, tii na kisika yayi, mpe mu ke kwikila ti Nge ke landila na kusala yawu, na ntangu nionso mu ke bikala ya kukwikama na kieleka ya Nge.

¹⁸⁴ Bika ti bawu nionso ntangu yayi kuzwa Luzingu ya Kukonda nsuka, Tata. Bika ti kilumbu yayi kuluta ata fioti ve samu na bawu. Na ngunga yina ntangu ba ke katuka na yinza yayi, bika ti yayi, yina mu me tuba na bawu, kukuma kieleka. Mpe mutindu beto me vwanda awa, bantu yina ke kufwa, bubu yayi, beno ke na kutala monte ya beto, beto ke na kubanza madia ya beto ya midi, na kusalu ya mbasi, na bakiadi mpe minianga ya luzingu, ya ke vwanda diaka ve na ntangu yina. Nionso yina ke zimbana. Ya ke vwanda diaka ve na minianga; kasi kiese mosi ya nene ya Seko. Pesa bawu mutindu ya Luzingu yina, Tata, bawu nionso. Mpe bika ti . . .

¹⁸⁵ Mu ke lomba na Nge yayi, Tata, ti konso muntu yina kele awa na suka yayi, yina me kuwa munu kutubila vision yayi, bika ti mu kutana na bawu nionso na simu yina yankaka; ata ti ya ke na babakala awa yina ke wisana na munu ve, mpe bakento, mpe. Kasi, Tata, kubika ata fioti ve yina kukanga beto nzila. Bika ti beto kukutana na bawu Kuna, mpe bawu kubaka mbangu, mpe, mpe beto kuyambana mosi na yankaka, na kubokaka, “Mpangi ya beto ya ntalu.” Bika ti ya vwanda mutindu ya talisamaka Kuna, Mfumu, na konso muntu, bayina nionso mu ke zolaka, mpe bayina nionso ke zolaka munu. Mu ke sambila ti ya ke vwanda mutindu yina, Mfumu. Mpe mu ke zolaka bawu nionso. Bika bawu kuvwanda kuna, Tata. Mu ke pesa bawu Luzingu ya Kukonda nsuka ntangu yayi. Bika bawu sala kitini ya bawu, na kundima Yawu. Samu beto ke lomba yawu na Nkumbu ya Yesu. Amen.

¹⁸⁶ Beto ke kaka na mwa bantangu ya fioti, samu na kusambila samu na bambevo. Mu ke mona ti beto ke na mwana mosi ya kento ya fioti, ya mbevo awa, mpe mama mosi ya kuvwanda na kiti.

187 Ntangu yayi, mu ke tuba na bampangi ya munu ya ntalu ya babakala, mpe ya bakento, beno bakula munu na mutindu ya yimbi ve na lemvo ya beno. Mu—mu me zaba ve yina me salama. Mu me zaba ve yina me salama. Kasi, Nzambi, ntangu mu ke kufwa, bika mu vutuka Kuna. Bika ti mu kwenda na Kisika yina, mu zola vwanda kisika yina, ata ti wapi sika ya vwandaka. Mu ke na kumeka ve na kuvwanda Paul yina zangukaka na zulu ya tatu. Mu zola tuba mutindu yina ve. Mu ke kwikila ti Yandi vwandaka pesa munu kaka kikesa, kumeka na kupesa munu mwa kima yina ke pusa munu na kukwenda na ntwala, na ministere ya munu ya malu-malu yina ke kwisa na ntwala.

188 Ya lendaka vwanda kukondwa luzitu kana mu tanga kima mosi awa, na mwa minuti fioti? Ya lendaka vwanda mbote mingi? Mosi ya ba-magazine ya mfunu mingi ya yinsi, Billy Graham:

189 “*Docteur Billy Graham Me Kuzwa Lubokilu Me Katuka Na Islam*, na page ya ntete ya *Afrikaans Times*, ya kilumbu ya kumi na tanu ya Ngonda ya zole, na mvula 1960. Nsoniki ya zulunale, yina vwandaka Musulman, Mohométan, ke banzaka ti bimangu lendaka kulanda kulonga ya Nsangu ya mbote ya Klisto, mutindu mosi mazono, bubu yayi, mpe kukondwa nsuka. Beto ke tanga, ‘Ya ke mutindu yayi: Klisto silaka na bilandi ya Yandi, ntangu Yandi tubaka, “Yandi yina ke kwikila na Munu, bisalu yayi Mu ke sala yandi mpe ke sala yawu; ata mpe ya kulutila nene yandi ke sala.” Dibuundu me salaka ntete bisalu, yina, binama ya Klisto na kati ya Biblia? Ya lenda sala yawu bubu yayi? Ya ke na muntu mosi ya luswaswanu, samu na kusala ata mpe kati-kati ya bimangu yina Klisto salaka kukondwa kutubila “bisalu ya nene”? Nge, mutindu muntu mosi, ya lukumu, nzonzi ya Buklisto, beno lenda telema, samu na kuvumbula bamvumbi na luzingu ya nzutu? Nge lenda tambula na zulu ya nzadi? Nge lenda belula bambevo mpe bampfofo kumona? Yayi kele ve, landila yayi ba me zonzila awa na zulu, yina ba-Mahométan me zabisa? To me zabisa, to, kumekama na Klisto . . . ? . . . mutindu bilandi me samuna yawu, to landila kundima ya beno?” Ya kieleka ti zulunale ya Musulman yayi me tungama na bansangu ya kulunga ve.”

190 Ba ke vweza Musulman yayi, kasi yandi vwandaka ya kusungama. Kasi tala yina bawu tubaka:

191 “Mvutu ya kieleka ya kutanga Biblia, mpe kuzaba Koran yawu yayi. Koran ke ndimaka ve ti . . . na nzila ya . . . ke zolaka ve kufwanikisa. Dibanza ya kutuba ti mahométisme me kuluta mpe ke na ntwala ya Buklisto, kele ya kuvedila,” (k-u-k-i-z-a-n-g-u-l-a) “kukizangula,” (mu banza), “ngindu. Nsoniki, na kutala, me simba kisika ya mfunu na kutubaka ti bimangu fwana vwanda na Dibuundu. Kasi awa diaka beto ke tula ntembe na kieleka ya nsoniki, samu nani lendaka manga mpe kutula ntembe na bimangu yina Révérend William Branham salaka na

ntwala ya ba-Musulman na Afrique du Sud, na yina mafunda kumi kundimaka Klisto mutindu Mvulusi na sni ya ministere ya William Branham, na Durban, Afrique du Sud, mpe bisika yankaka na yinza ya muvimba, to ya T. L. Osborn na Afrique Orientale? Ya kieleka, beto ke simbisa Billy Graham na nkama na zulu ya nkama. Beto me zonzila diambu ya matata, ya kele ve. . . Diambu yaji ya matata ke na mfunu ve.”

¹⁹² Kasi na nionso yina (Ba bokilaka munu . . . ba tubaka ti beto vwandaka bafanatiki, beto zabaka ve yina beto vwandaka sala.), ya lombaka ti bawu pesa kimbangi, na zulunale ya bawu mosi, ti Nzambi me salaka yawu, na mutindu nionso. Nzambi kele kaka Nzambi, bubu yayi, mutindu Yandi vwandaka ntete. Beno fwana banza ve ti ba ke kwikilaka yawu ve, ti ba ke monaka yawu ve. Ya ke kima ya kubumba ve; ya me salama ve na kisika mosi ya kubumbama. Mpe bankama ya mafunda ya bantu vwandaka kuna, ba monaka yawu. Ntangu ba monaka ti mwana-bakala yina ya kikata, kwisaka kuna, Mpeve-Santu tubaka na yandi yina me tala luzingu ya yandi, mpe bima yankaka, mpe yina salamaka kuna. Mpe kumona ba-Musulman mafunda kumi kufukama bawu mosi, kizizi na ntoto, samu na kundima Yesu Klisto mutindu Mvulusi ya bawu.

¹⁹³ Beto ke kaka na ba T. L. Osborn, mpe nionso yina, yina ke na kupesa diaka Madia ya mameme. Mu banza ti Mpangi Osborn me vwandaka ntete ve na kati ya ba-Musulman. Bawu yina ke tubaka ti ba me zabana mingi. Kasi beto ke kaka na Nzambi yina lenda nwanina dimeme na nkosi, yina lenda nwanina dimeme na ulusu.

¹⁹⁴ Ya salaka munu mbote na kuwa ti ba lendaka sonika yawu mpe kundima yawu. Ve, bawu banza ti ya lendaka salama ve; bawu ke kwenda ntama mpe ke vutuka, mpe ke tuba, “Ah, bilumbu ya yawu me lutaka.”

¹⁹⁵ Ba-Musulman ke tubaka, “Bawu kele? Biblia nionso kuna me lutaka. Beno nionso ke na kifu. Beno ke sambilaka Muntu, Muntu yina kufwaka, mpe Nkumbu ya Yandi vwandaka Yesu. Mpe Yandi kufwaka, bamvula mingi me luta, mpe ya ke diambu ya mutindu yina mumbandu Yandi vumbukaka na lufwa.”

¹⁹⁶ Kasi ba lendaka tuba yawu ve na lukutakanu ya Durban. Yandi vwandaka kuna ke sala mambu ya mutindu yina Yandi salaka, ya siamisaka na ntwala ya bawu. Ntangu ata mpe ba-denomination fwana vutuka na manima, muntu yina kaka sonikaka mpe tubaka na munu ti mu fwana kumanga malongi ya munu ya Biblia, ya vwandaka yandi fwanaka sonika yawu na zulunale ya bawu. Nzambi ke sala ti bawu kukumisa Yandi, na mutindu nionso, kuna, kukondwa kuzaba. Ya kieleka. Yandi ke sala ti bawu kukumisa Yandi, na mutindu nionso.

¹⁹⁷ Beto ke na mwana-kento mosi ya fioti ya kimbevo, yina me vwanda awa. Ya ke mwana ya nge? Yinki kele mpasi ya yandi,

mpangi-kento? [Mpangi-kento me tuba, “Ya ke hemorrhagie ya yintu.”—Mu.] Yinki mama? [“Hemorrhagie ya yintu.”] Hemorrhagie ya yintu. [“Mu sonikilaka nge mukanda, bamvula mingi me luta, samu na hemorrhagie ya yintu ya yandi.”] Oh, yinga. [“Yandi ke kaka mbevo ntangu yayi, kuvwanda bamvula yiya na Ngonda ya nana.”] Bamvula yiya, na Ngonda ya nana. [“Mpangi Neville kwendaka kuna samu na kutala yandi.”] Oh, ya me katuka na Marengo, to kisika mosi kuna? [“Paoli.”] Paoli. Mwana-kento yango, yandi yayi? Kima mosi kaka, mama, lenda vulusa mwana yayi ya kento: ya kele, Nzambi zaba yandi. [“Ya me kuma mbote mingi kulutila mutindu yandi vwandaka.”] Mu ke na kiese mingi samu na yawu.

¹⁹⁸ Nge vwandaka kuna samu na kusambila samu na yandi, Mpangi Neville? [Mpangi Neville me tuba, “Yinga, tata.”—Mu.] Kubanda Mpangi Neville kwendaka kuna samu na kusambila samu na yandi, yandi me kuma mbote mingi. Ya kele diaka na mivungi yina me zaba Madia ya mameme.

¹⁹⁹ Yinki kele mpasi ya nge, mpangi-kento ya luzolo, yina me kuvwanda kuna na kiti, mpasi ya nge? [Mpangi-kento mosi me tuba, “Yandi ke na cancer.”—Mu.] Cancer.

²⁰⁰ Mbote, kana mu lendaka yufula na beno kima mosi, mu banza kaka awa. Bantu yikwa awa me belukaka na . . . ya cancer? Beno telemisa maboko ya beno. Tala awa, mpangi-kento. [“Yandi kele kaka kifwa-makutu, mpe yandi lenda kuwa ve yina beno ke tuba.”—Mu.]

²⁰¹ Nzambi kele Munganga. Beto me zaba yawu. Kana mu tubaka na beno ti mu lendaka kwenda kuna mpe kukatula hemorrhagie yina na mwana-kento yango mpe mu belula yandi, mu ke tuba na beno diambu ya luvunu, to, mu lendaka katula cancer na kento yina. Kasi mu zaba kima mosi, kuvwandaka na ulusu mosi (cancer, tumeur, kimpofu, ata mpe lufwa) yina kangaka mwa mameme ya Nzambi, kilumbu mosi, mpe mu kwendaka kuna na ngolo ya Nzambi, mpe mu kufwaka yandi mpe vutulaka dimeme yina. Ya kieleka. Mpe beto ke kwenda bubu yayi, na kima ya nene ve, *kingandi*. Mu ke kwenda na mwa lanse ya fioti ya bisambu. Yandi ke vutula yandi.

²⁰² Nge ke kwikila yawu, mutindu yina ve, mpangi-kento? Nge ke kwikila, mpe, mutindu yina ve, mpangi-kento? Bantu yikwa na kati ya beno ke kwikila na ntima ya beno ya muvimba ntangu yayi?

²⁰³ Ntangu yayi beno kulumusa bayintu ya beno na ntangu mu ke kwenda sambila.

²⁰⁴ Tata ya Luzolo, kento mosi ya kitoko ya ntwenia me lala awa, yina lenda kutambula ata fioti ve, kaka kana Nge sadisa yandi. Mbeni me kanga yandi. Yandi me kuma na zulu ya maboko ya dokotolo nionso. Mbeni me tinisa yandi ntama mingi na mpwasi,

na mutindu ti dokotolo lendaka kusala ata kima mosi ve. Kasi yandi kele ve na nganda ya diboko ya Nge, Mfumu. Yandi ke kaka kisika yina Nge lendaka tula diboko ya Nge na zulu ya yandi. Na kutulaka kivuvu na zulu ya Ndinga ya Nzambi, mu ke tetika maboko ya munu na zulu ya kento yayi ya ntwenia, mpe mu ke fundisa hemorrhagie yayi ya yintu. Na Nkumbu ya Yesu Klisto, mu ke vutula yandi diaka na kento ya mavimpi ya mbote. Yandi ke zinga samu na nkembo ya Nzambi. Bika yandi kuvwanda na mavimpi ya mbote, yandi kukota mpe yandi kubasika na yinzo-Nzambi yayi, mutindu bayankaka yina kukotaka awa, mutindu mosi, samu na kupesa lukumu na Nzambi. Na yina vwanda yawu, na nzila ya Yesu Klisto.

²⁰⁵ Mutindu glaçage ya bansuki ya yandi, kaka mwa kubaluka fioti diaka, mpe yandi ke vwanda na Yinsi yina kuna kisika mu monaka diaka ve biboba, kasi bantwenia. Kasi yandi me kuzola bayina me vwanda awa, yandi ke na kudila, mpe ba ke zolaka yandi. Mbeni yina ya nene kangaka yandi mpe tinisaka yandi ntama ya diboko ya dokotolo, nkosi ya boma ya cancer. Nzambi, mu me kwisa, kulanda yandi. Mu me kwisa kuvutula yandi. Mu me kufwa nkosi ya cancer, na Nkumbu ya Klisto yina ba ke nungaka, samu na Yina mu kele ntumwa. Bika yawu kubika yandi, mpe bika yandi kuvwanda na mavimpi ya mbote, mpe yandi kuzinga bamvula mingi, diaka, samu na lukumu mpe nkembo ya Nzambi, na nzila ya Yesu Klisto Mfumu ya beto.

²⁰⁶ Ntangu yayi, Tata ya Mazulu, yina ke kaka na kati ya kinkuti ya kisengo ve, na kati ya mpele ya nsongi ve, na mwa nonzolo mpe vocabulaire ya mutubi mosi ve, kasi na mwa lanse ya kimvuka, ya fioti ya lukwikilu. Mu me kwisa samu na moyo yayi, mpe nzutu yayi ti mbeni ya cancer me kanga yandi ntama ya maboko ya dokotolo. Kasi mu me kwisa samu na yandi, na suka yayi, Mfumu, samu na kuvutula yandi na matiti ya mubisu mpe masa ya pima. Na nkumbu ya lunungu Yesu, samu na yina mu kele ntumwa ya Yandi. Na lukwikilu ya kieleka, mu ke kwikila ti yandi ke vutuka, na ngolo ya kisambu yayi beto me sala. Na yina ya ke vwanda mutindu yina . . . ? . . .

²⁰⁷ (Mu ke kwikila ti ya ke na kisalu ya mbotika. Mutindu yina?) [Mpangi Neville me tuba, “Yinga, tata. Milongi zole ke na bantu yina ba ke botika ntete.”—Mu.]

²⁰⁸ Beno lenda telemisa bayintu ya beno na mwa ntangu fioti? Pasteur me tuba na munu . . .

²⁰⁹ Bantu yayi ke ya kubela mingi, mingi diaka. Ba ke vwanda na mavimpi ya mbote. Beno sala kaka ve . . . Ya ke mbote. Nsilulu ya Nzambi ke kubwaka ata fioti ve. Beto ke kwenda kusosa yawu.

²¹⁰ Ba ke na kisalu ya mbotika. Ya ke na bantu yankaka fwana kwenda. Beto ke vwanda diaka na lukutakanu na nkokila yayi.

²¹¹ Ya ke na muntu awa yina lendaka kwisa ve na nkokila yayi, yina ke zola ti beto kusambila samu na beno na ntangu yayi, yina

ke vwanda awa ve na nkokila yayi? Na yina beno lendaka kwisa awa, beno yina lendaka kwisa ve na nkokila yayi. Mu ke vwanda diaka na ntangu mingi; samu na kusala ndonga ya bisambu, na nkokila yayi. Ba ke botika bantu yayi.

²¹² Nge ke na mwana-bakala ya fioti kuna? Mbote mingi. [Mpangi-bakala mosi me tuba, “Ya ke vwanda mbote mingi kana mu pesa nge yayi?”—Mu.] Yinga, mpangi-bakala. Matondo mingi, na nge. Ya ke vwanda mbote mingi kana mu tanga yawu na manima ya mwa ntangu fioti to kaka na ntangu yayi? Matondo na nge, mpangi-kento.

²¹³ Ntangu yayi kana beno pesa munu kaka muniti mosi to zole diaka, na yina beto lendaka vwanda na kusalu ya—ya mbotika. Mu zaba ti beno ke zola kumona yawu.

²¹⁴ Mpe bayina nionso ke zola kubaka mbotika na suka yayi, mbote, beno, bamama beno kwenda *awa* samu na kusoba bilele ya beno, mpe babakala kukwenda na lweka *yayi*. Na yina na ntangu mu ke sambila samu na bambevo yayi, na manima beno lendaka vwanda ya kukubama samu na kusalu ya mbotika. Mpe samu na bayina ntangu yayi ke . . .

²¹⁵ Ntangu yayi, na nkokila yayi, mu ke meka na kusala mwa ndonga ya bisambu, na nkokila yayi, na nswalu, kaka na ntangu ba ke kwisa. Mpe beto ke banda na Buku ya 1te ya ba-Ephésien, na nkokila yayi. Mpe beto ke vwanda na kiese ntangu yayi na kuvwanda na beno kuna kana beno ke na dibuundu ve ya kukwenda. Kasi kana beno ke na pasteur ya beno mpe dibuundu ya beno, na yina beno—beno kwenda na dibuundu ya beno yina beno ke pesaka simbisi.

²¹⁶ Kana beno yina fwana kukwenda, mpe bayina ke kwenda na ntangu yayi, Nzambi kusakumuna beno. Beno vwanda na beto diaka ntangu beno lenda. Beto ke vwanda na kiese na kuvwanda na beno.

²¹⁷ Nge zola ti ba sambidila nge, mpe, mpangi-bakala? Yinki kele mpasi ya nge? Hypertension.

²¹⁸ Ntangu yayi, beno bayankaka, kana beno zola kulumusa bayintu ya beno, na mwa minuti fioti, beto zola kusambila.

²¹⁹ Tata, mu ke tonda Nge, bubu yayi, samu mwa lanse ya muvungi, kisambu yina me sala ti nkosi kufukama, mpe ba me botula yandi mwana-dimeme ya fioti, mpe ba me vutula yandi na mama ya yandi mpe tata ya yandi. Mu ke sambila samu na mpangi ya beto. Mu ke lomba ti Nge ke vutula yandi na lukengolo, diaka, Mfumu. Bika ti tension ya yandi mpe bampasi ya nzutu ya yandi kuzimbana. Mu ke kwenda kusosa yandi, Mfumu, samu na kuvutula yandi, na Nkumbu ya Yesu Klisto. Ya vwanda mutindu yina. Amen.

Nzambi kusakumuna nge, mpangi-bakala.

Mu ke kulumuka, mu ke mona ti nge ke mwana-bakala ya fioti, ya mpofo.

220 Kima mosi diaka mu zola kutuba. Mu vwandaka...ya kubela mingi, mu vwandaka kuluka. Mpe mu banzaka...Mu zola ve ti beno simba yayi, kana beno lenda. Mu banzaka, “Nzambi, yinki mu ke pesa kana mu lendaka kuwa muntu mosi me telema kuna na nganda? Kento ya munu ke tuba, ‘Billy, ya ke tata mosi ya kiboba awa yina zola mona nge.’

221 “Mpe awa ke kwisa mwa muntu mosi ya dibandi, na bamika ya mpembe na kizizi ya yandi. Yandi ke kota, yandi ke tuba, ‘Nge ke Mpangi Branham?’

“Mu ke tuba, ‘Yinga, tata, ya kele munu.’

222 “‘Nkumbu ya munu kele Simon.’ Yandi ke tetika maboko ya yandi na zulu ya munu, mpe yandi ke tala munu na mwa muniti fioti. Yandi ke tuba, ‘Nge ke mukwikidi, Mpangi Branham.’

“‘Yinga.’

223 “‘Ya ke vwanda mbote mingi.’ Simon Pierre, ya Biblia. Mu ke sepela na yawu mingi! Yandi fwanaka kutuba mingi ve. Yandi ke tetika kaka maboko ya yandi na zulu ya munu, vwanda na mavimpi ya mbote.”

224 Na manima yina ke salama na munu, na lusalusu ya Nzambi, mpe na lemvo ya Nzambi, ya ke na makumi ya mafunda ya bantu ke kwikila mutindu mosi, ntangu mu ke kwisa na bawu. Mpe mu banzaka, “Mfumu, sadisa munu na kukwenda na bantu nionso yina mu lendaka kwenda, kuna. Sadisa munu kaka—kaka...”

225 Mu banzaka, “Kana Simon, to Paul, bayankaka kati ya bawu, kukwisa mpe yandi tuba, ‘Nge ke Mpangi Branham?’

“‘Yinga.’

226 “Ba ke tetita maboko ya bawu na zulu ya munu, mpe ba ke tala munu, mpe ba ke tuba, ‘Mbote mingi, Mpangi Branham,’ ba ke kwenda.

227 “Mu ke kuma mbote. Mu ke vwanda na mavimpi ya mbote. Ya kieleka. Mu tubaka...Tala, kikesa ya munu ke mata na ntangu yina. Mu ke tuba, ‘Mu ke vwanda na mavimpi ya mbote.’” Yinga, tata.

228 Mpe ya ke na bantu yina ke kwikilaka mutindu yina bubu yayi. Mpe ya ke samu na bawu mu me kwisa awa samu na kusala yawu, kutetika maboko na zulu ya beno, kulomba na Nzambi.

229 Mu zola kwenda na mwana-bakala yayi, mpangi-kento, na mwa muniti fioti. Yandi ke mwana-bakala, ya mpofo. Kubanda wapi ntangu yandi ke vwandaka mpofo? [Mpangi-kento mosi me tuba, “Kubanda lubutuku.”—Mu.] Kubanda lubutuku.

230 Mbote, mwana! Oh, nge ke mwana-bakala ya fioti, ya kitoko...?...

²³¹ O Nzambi ya lemvo! Ntama kuna ya maboko ya badokotolo, na lubutuku ya mwana-bakala yayi, yandi butukaka mpofu, mpe yandi lenda kumona ve; mwana-bakala yayi ya kitoko, ya lutondo. Mpe mbeni, na ntwala mwana yayi kuzwa siansi na luzingu, yandi tinisaka yandi ntama ya maboko ya dokotolo. Na yawu, mu me kwisa kusosa yandi, na suka yayi, Mfumu. Na mwa lanse yayi ya fioti, ya kisambu. Bika ti mu vutula yandi, Nzambi. Mu ke kutana na mbeni, diabulu, na Nkumbu ya Yesu Klisto, mpe mu ke lomba mwana-bakala yayi samu na Nzambi. Mu ke lomba kumona ya yandi, samu Nzambi, kuvutula na yandi yina Satana kuyibaka yandi. Bika ti yandi kuzwa yawu. Na Nkumbu ya Yesu Klisto, ya ke vwanda mutindu yina. Ntangu yayi, bika ti ya vwanda mutindu yina.

²³² Ntangu yayi, mpang-kento, ya luzolo, ntangu yayi, kuvwanda ata na mwa ntembe ve ti mwana-bakala yayi ya fioti ke vwanda na mavimpi ya mbote. Mpe mu ke lomba na nge, na kukwisa vutuka na yandi awa na yinzo-Nzambi, mpe kutalisa na bantu ti, yandi lenda mona, ntangu yayi, mutindu yina ve?

Pesa yandi kumona ya yandi, na Nkumbu ya Yesu Klisto...?...

²³³ Mfumu Yesu, samu na kutetika...Mwana yayi beto ke sambidilaka mingi! Kasi, na suka yayi, mu ke kwisa diaka na Nkumbu ya Yesu Klisto, mu ke simba mwa lanse yayi Nge pesaka munu. Mpe Nge me sadisa munu na yayi, Mfumu, na Ngolo ya Nge, samu na...kubasisa yandi na yinwa ya cancer, kubasisa yandi na yinwa ya lufwa yawu mosi, samu na kuvumbula bamvumbi na manima ba tubaka ti bawu kufwaka, mpe ba kumaka ngolo mpe madidi. Mu ke kwenda sosa mbeni yayi, na Nkumbu ya Yesu Klisto. Na yawu vutula yandi diaka na mavimpi ya mbote, Mfumu. Pesa yawu. Ya salama mutindu yina, samu na nkembo ya Nzambi.

²³⁴ Mpe ba ke sambila samu na nge? [Mpangi-kento mosi ke tuba na Mpangi Branham—Mu.] Nge ke mukwikidi? ["Yinga."] Mfumu, mu ke nata yandi, pene ya mwa lanse yayi. Na Nkumbu ya Yesu Klisto, bika ti ya bika yandi mpe ya vutuka ata fioti ve.

²³⁵ [Mpangi-kento mosi ke tuba na Mpangi Branham—Mu.] Mbote, mwa lanse yina mosi, yina kwendaka mpe bakaka Mpangi Harley, mpe samu na mwana ya nge ya kento mpe nge mosi.

²³⁶ Ntangu yayi, Tata ya Mazulu, mu ke kwenda kusosa mbeni yango, mu ke sadila mwa lanse yayi Nge pesaka munu, samu Nge tubaka, "Kana nge nata bantu na kukwikila na nge, mpe nge vwanda ya kuvedila ntangu nge ke sambila," mwa ditadi yina ke kwenda kufwa yandi. Bika yawu kukwenda ntangu yayi, Mfumu, mutindu mu ke tinda yawu na lombilu ya

yandi. Na Nkumbu ya Yesu Klisto, bika yawu vwanda mutindu yina. Amen.

²³⁷ [Mpangi-kento mosi ke na kusolula na Mpangi Branham—Mu.] Mbote mingi, mpangi-kento. Ntangu yayi beto ke . . . Bannerf kele ntama ya maboko ya badokotolo. Ba lenda pesa nge kima mosi samu na kulembika nge, kasi ya ke kumisa nge yimbi mingi, na manima ya yina. Yinga. Tala ntangu yayi. Beto ke basika na manima ya yawu, na suka yayi. Kubasika; kuvutula nge. [Kisika ya mpamba na bande.]

²³⁸ Mfumu Yesu, . . . [Kisika ya mpamba na bande—Mu.] . . . mwa matadi tanu ya fioti, l-u-k-w-i-k-i-l-u [f-a-i-t-h—Mu.], mpe lanse ya bisambu. Mpe mu ke katula mpangi ya munu ya kento na ngolo ya kidi-kidi . . . ? . . . kuna. Mu ke vutula yandi na matiti ya ngemba mpe ya mubisu mpe na masa ya pima. Mu ke sala yawu na Nkumbu ya Yesu Klisto. Amen.

[Mpangi-kento mosi ke na kusolula na Mpangi Branham—Mu.]

²³⁹ Tata Nzambi, mwana-kento yayi ya fioti, beto ke vutula matondo ti ya vwandaka ve kubeba ya misisa. Kasi kukondwa kutala yina ya kele, ya ke kaka na maboko ya Nge, Mfumu. Mpe mu ke kwisa na mwa lanse ya lukwikilu, mpe ditadi yayi. Mpe mu ke simba ditadi yayi na ngolo nionso yina mu lenda losa yawu. Na Nkumbu ya Yesu Klisto, bika yawu bula kisika yango. Bika ti mpangi ya beto ya kento kubeluka. Mu ke sala yawu na Nkumbu ya Yesu Klisto.

[Mpangi-kento mosi ke na kusolula na Mpangi Branham—Mu.]

²⁴⁰ Mutindu kento yayi ya ntwenia, na mwa mwana ya yandi, mwana ya fioti yina yandi zola kukutana na yandi kuna, na simu yina kuna, na Yinsi yina ya nkembo yina mu vwandaka zonzila, mpe bawu . . . Mama yango ke zinga ve samu na . . . kusansa mwana yango ya fioti, to mwana yango lendaka zinga mingi ve kukondwa lusalusu ya Nge. Kasi mu me kwisa na lanse, na bangolo nionso mpe lukanu yina mu lendaka baka samu na mbeni. Mpe na Nkumbu ya Yesu Klisto, mu ke bula yawu na yandi. Ba ke vwanda mbote, samu na nkembo ya Nzambi. Na Nkumbu ya Yesu. Amen.

[Mpangi-kento mosi ke na kusolula na Mpangi Branham—Mu.]

²⁴¹ Oh, ya ke kitoko mingi. Mu ke na kiesa. Mbote, ministere yina, kuna, vwandaka ministere ya kulutula nene samu na kutalisa na bantu. Yawu talisaka na bisalu . . . ? . . .

²⁴² Tata ya beto ya Mazulu, Satana me tinisa mama yayi ya leke ntama na maboko ya badokotolo. Ba lendaka losa kaka nkisi mutindu yina, Mfumu, ya ke pasula yandi, ya ke pasula yandi, na mpasi ya ke zaba kisika yandi kele. Na manima ntangu yandi

ke kwisa, yandi ke kuma yimbi mingi. Kasi mu ke kwisa na lanse yayi ya lukwikilu, na ditadi, mu ke ludika yawu na lukanu ya kieleka, samu na kubula na kisika ya kieleka. Na Nkumbu ya Yesu Klisto, mu ke katula na yandi kidi-kidi yayi, samu na nkembo ya Nzambi. Amen.

[Muntu mosi ke na kusolula na Mpangi Branham—Mu.]

²⁴³ Nzambi ya luzolo, Mpangi George vwanda ya kulala kuna, vwanda kufwa, ntama mingi ve, mu monaka yina lukwikilu salaka samu na yandi. Ntangu yayi yandi ke na rhumatisme, Mfumu. Beto me bakula ti ba me pesa yandi ntumbu mosi ya cortisone, kima yina lendaka lembika mpasi, kasi ya ke katula ve kima yango. Na yina beto pesa kisambu yayi, na Nkumbu ya Yesu Klisto. Bika ti rhumatisme kukwenda. Bika ti yandi kwenda na yinzo na mavimpi ya mbote.

Matondo na nge, mpangi-bakala.


²⁴⁴ Nge ke mbote, nkundi ya luzolo? [Mpangi-kento mosi ke na kusolula na Mpangi Branham—Mu.] Oh, la la! Makelele mingi. Beno lenda kuwa mambu nionso? Uh-huh. Ya ke kaka na zulu ya bafwa! Nge ke mukwikidi kati na Mfumu Yesu? [Mpangi-kento me tuba, “Amen.”] Mu ke mona kento mosi ya kitoko Kuna, mosi ya bilumbu yayi. Nge ke vwanda diaka ntwenia mvula na mvula. Mu zaba ti nge ke zola kuzinga ntangu yayi samu na nkembo ya Yandi. Kuvutuka na . . .

²⁴⁵ [Mpangi-kento yango me tuba, “Ve, mu ke na kiadi samu na mwana ya munu ya bakala.”—Mu.] Mwana ya nge ya bakala. [“Yina me kwendaka kuna bamvula zole me luta.”] Nge ke mona yandi ve? [“Yandi kele na maboko ya Nzambi.”] Oh, yandi—yandi me kwendaka? [“Uh-huh. Na nzila ya lubwaku ya lufwa.”] Oh, yawu yina. [“Mpe kiadi ya munu.”] Kiadi mingi na ntima. Yinga. [“Mu ke na kiadi . . . Mu ke na kiadi mingi na ntima. Mpe mu ke na nsatu mosi mutindu, kana ya ke luzolo ya Nzambi, mu ke zola ti Yandi kubaka munu. Mu ke na kima yankaka ve kasi kiese kati na Yandi.”]

²⁴⁶ Mpangi-kento ya luzolo, mu ke zola ti nge kuma na kisika yina nge vwanda mbote. Yandi kuwaka vision, na suka yayi? [Mpangi-kento yango me tuba, “Yandi lenda kuwa mbote.”—Mu.] Mbote, nge ke tuba na yandi.

²⁴⁷ Mbote, yandi ke tuba na nge yina salamaka. Kaka na zulu ya pema ya nge awa, mwana-bakala yina ya ntalu ke na kuingila nge. Nge ke vwanda ntwenia mutindu yandi. Zola, kaka zola . . . [Mpangi-kento yango me tuba, “Mu ke zola ve kubikala. Mu ke zola kukwenda kuna na yandi, kana ya ke luzolo ya Nzambi.”—Mu.]

²⁴⁸ Tata ya Mazulu ya luzolo, luzingu ya bantu me kwenda. Ya me bikala diaka na ya mingi ve. Mpe mwana ya yandi ya bakala ya ntalu, me zabukaka nzadi, kana ya lendaka kaka

kutala na manima, yandi ke tuba, “Na mwa bilumbu fioti kaka.”
Yandi ke na kuingila masuwa, Mfumu, ya ke nata yandi na
kati ya lubungi, kuna na Yinsi ya nkembo. Sakumuna yandi,
Tata, mpe pesa kikesa na ntima ya yandi. Bika ti yina kuvwanda
lukutakanu mosi ya nene, na simu yina ya nzadi. 

NTINU ME LOSAMA KNG60-0515M
(The Rejected King)

Nsangu yayi ya Mpangi William Marrion Branham, kulongamaka na Kingelesi, na suka ya Lumingu, na kilumbu ya 15 ya Ngonda ya tanu, n mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org